


道



瑤草園初集卷之五



蘇州府志

蘇州府志

武林吳之鯨伯霖甫著

門人胡廷賓用予甫校

宣平教諭劔龍曹公暨配吳孺人合墓墓志

銘

昔東京桓榮少遭坎壈講習不勸族人元卿沮
之毅然不顧卒以儒術顯迨子郁普孫焉俱世
其傳稱桓君大小學因竊伏嘆以為士用明經

起家無崔盧之著姓而埒齊魯之被服爲箕裘
作始自足標範來禩如武林劔龍曹先生足述
也先生諱友益字思謙劔龍其號先世大名濬
縣渤化里人宋靖康諱爵者戍金山戰死建炎
二年錄陣亡子孫護宮徒杭州左衛入國朝
并右衛正德七年玉與鳳俱絕海以旁繼生鳴
和公鸞鸞生近亭公經卜居芝松里先生父也
母周方娠夢東郭鄒公登其堂遂生卽以名甫

三齡慟母周如成人事近亭公及繼母徐媪色
養備至顧先世無業儒者而先生穎敏自天性
日誦數百言翁媪不之竒也命之賈命之醫復
命之從胥史先生長跼請曰家公間關沒身丁
男苦轉饑願屈首受書雍容澤宮之禮樂且覬
爲子姓地也安問司空城旦書乎翁媪不能疆
年十六始問易於鳳臺陳公逮事虛亭陳公見
湖孔公所至傾其儕偶尋補郡弟子員試輒高

等旣廩名藉甚羔鴈日至先生益自喜寢懷鉛
筆行誦詩書引錐難草日以爲常乃六校賢闈
勿售癸巳竟以次膺貢需選闕下得灤州司訓
先生怡然就道曰吾斬一第於司命而使得以
六籍爲琴箏講肄爲鐘鼓吾志也北方學者質
疑送難益諄諄與解紛不間寒暑丁酉庚子登
鄉薦者各二人前此所未覩遠近爭稱先生有
造云滿六載預十一獎擢宣平諭去家五百里

而遙其殷殷善誘無異灤州而引經斷讞時爲
邑長虛席甲辰督撫尹公驟至括蒼兵餉不給
林尹懼議以空券爲貸無應者先生集土著父
老溫語勸諭遂至踰額尹益感媿聲稱日著而
三載所苦嵐厲翩然賦歸來矣語家人曰自吾
之請儒於吾翁也惴惴以不勝是愬今幸脫高
安積米而委蛇冠絢於有虞氏之米廩足慰堂
上矣吾有子爾忠從子爾思不令之外塾吾訓

之從孫代何亦不令之外塾吾子訓之先後俱
列青衿而代周輩能讀父書咿吾聲徹戶外從
此不替家訓其有興乎小子勉之噫先生夙契
墳典奮身爲儒宗遂以及世成絃歌令族雖稽
古之效少遜而大小學不讓桓氏矣先生元配
吳孺人爲太醫意齋公長女母湯繼夏孺人哀
往事居與先生並著純孝近亭公寢疾先生夫
婦昕夕藥禱三閱月不解衣視含幾殞徐母性

嚴切具甘麤問疾苦曲當其心撫異母弟如同
生十年不忍析箸嘗悉弟輓輸馳京口請免不
得捐橐佐之而孺人亦娣姒篤愛受金娣靡留
之托視兩姪及婦無幾微間也里人咸稱曰先
生不減高孝讓孺人復何愧禮脩至其操約嗇
佩樸貞克蔬曳縞謝世俗鮮綺脩業績勤端謹
質直則內外齊德宜先生萬里獨征而悲思孺
人無已也然先生持大體秉方嫉邪慷慨爭復

先聖祀田幾致奪精客遺金去久不至近亭公
慮疾革不能待先生亟召來俾親返之以慊其
志老幹竊俸貲托他故遣歸非意相干悉置勿
校又皆褒衣大儒所不及者詒謀亢宗有以哉
先生生嘉靖壬辰八月二日卒萬曆戊申正月
三日享年七十有七孺人生嘉靖庚寅十月廿
七日卒萬曆己丑五月廿四日子一爾忠邑庠
生娶貢士柳洲楊公女繼文學體山汪公女孫

男一代周娶於王郡文學巨衡公女孫女二長
伯玉適邑諸生張可濟次仲玉適方慎修卜兆
有期矣嗣君自爲狀屬鯨題羨門之石夫先生
知交半隸仕籍何難徼世之通人而以及不佞
鯨也顧先生抗志儒術司鐸九載養恬林丘以
正而斃依經守義道韵清約嗣君恪守矩矱醇
穆有先輩風則先生所爲重與所以重先生者
必有在矣辭既不獲僭系以銘銘曰

經天大道垂緇林鱸堂發祥通詰霧擁書抱籍
啓后昆稟采豐華七業興居恭執敬履孔繩柔
嘉儷美訶鷄鳴鬱芴雙玉埋佳城赤霄紫泥耀
雲仍請視渤海千秋銘

邵室費孺人墓銘

邵古菴山人自爲其室費孺人誌而廣求銘於
文人亦以及余余寒士也寒士有附高位顯有
附寒士顯者乎哉然山人志之矣爲山人志也

者爲山人妻者也山人之居於山孺人之以也
至其勤李夫人之祝根心愿恪野史足徵可以
銘矣謂寒士銘不顯乎哉銘曰

古有土窟一絃瓢浮五嶽老易北渚之涯者而
山人與以有其齊古有射覆低昂賡酬漁艇夜
穿狐趙之牖者而山人之妻無其儀古有標鄭
陽之金顰稻箱之雪咨且摺拾者而山人之妻
全於天以無其非奉璋峩峩誰而勃谿蓋未始

出吾宗而胡云德機短裳縞衣操春髻推三十年餘將荼蓄租流溪刻之饜而藏風月之需曰全而歸爲君先驅其斯爲山人之妻山人豈伊夫綱不疑後死可期允矣弘毅者之兒

文學新陽錢公暨配屠孺人合葬墓誌銘

萬曆壬寅夏孟故文學新陽錢先生卒先生由明經發聲宏詞博學以病廢不竟其用性任俠好義慷慨振急不避險難好談論風神奕奕遠

近宗爲陳太丘咸以一當先生爲快卒之日聞訃至者踵相泣聲徹街達里爲罷市先生嗣子奏勲等旣卜期將啓母屠孺人壙合窆焉則手叔氏狀匍匐向鯨慟曰惟是中羨之石竊有請也鯨皇遽固謝曰錢於吳越稱甲姓先生於錢稱大宗禮不云乎公室視豐碑母亦是令德懿訓將詔諸來襍若人之有冠冕鯨分屬末行方望綏奉纓而令泚華爲泉下羞耶則奏勲匍匐

不起慟益甚曰先君與子如北海之於正平曲
江之於長源爲忘年交也國人莫不聞知先君
莫子若而忍遂湮之夜臺吾不願廣鼎華橫托
聞人以貽受諛者辱也於是鯨惻然淚潛下操
筆受事按狀先生諱杉字子良新陽其號系出
武肅王鏐世居紹興入我

明爲十七世孫循齋公述叅閩藩政欲依守文
穆王墓始徙杭居江干之鳳凰里五傳而至先

生父栢山公淮母吳氏以獨子最憐愛之不令
外塾乃先生天才超瑋英爽捷給好古文竒字
下帷攻苦不以晝夜寒暑爲解年甫髫上自汲
冢石鼓列函以逮騷賦稗史周環百家靡所不
究旣就試試經義射策援筆千萬言立就迅于
風雨郡守環山孫公孟大竒之拔第一督學方
山薛公復寘之首士林爭避三舍謂是折角五
鹿者噴沫成雲煙揮灑皆珠玉公車誰復雁行

孫公雅好獎進既竒先生才與縱橫語益豪快
擊節稱賞每載酒遊湖山間刻燭限韵未嘗不
呼先生與俱或拈一物各疏故實以對先生未
嘗不連坐十席也時迫秋試名噪甚人咸屈指
先生亦喜自負而先期抱庚桑壅腫之疾一日
易數醫刀鍼灸踝雜投遞進郡太守郵問起狀
以金錢勞醫者冀得支扶入闈以驗人倫之鑒
而筋理不任薰灼矣先生既坐廢謝博士藉而

嗜古績學其所自尚居恒與配屠孺人進則修
甘膳供堂上歡退則讀書鼓琴以爲娛孺人出
於屠亦仁和著姓父鶴洲母阮氏少婉嫕不苟
笑訾嘉靖庚戌歸先生入門雍穆賓相酬也柏
山公與吳媪性最嚴不易中其歡先生及屠孺
人孺慕彌切左右承順翁媪時爲解頤柏山公
篤友于旣讓先人產躬拓地卜築過劬成疽不
起孺人刲股和糜以進絕不使先生知翁一日

感異夢廉得實咸相詫曰孝哉屠婦而神抑何
靈也及翁媪相繼逝先生醫禱喪葬易戚俱至
孺人實贊翼之以底於勿悔而孺人亦善病勢
孔亟先生同堂兄橋逝嫂陸無出宗長緒山公
主以仲子奏成爲橋後先生恐傷孺人心計且
緩期孺人遽相語曰吾幼讀禮大宗不可絕且
吾旦暮人也大宗無子而有子吾子無母而有
母吾何虞耶遂卜日遣嗣而孺人卽以是夜卒

人益稱錢有賢婦真無忝魯義姑哉顧先生性
磊珂不喜樸簌小節又連遭大痛家日落間一
設皋比進諸生問字者月校殿最與主司衡文
常不爽諸生日益就帷中履錯而先生意勿屑
也時掀髯自嘆曰范少伯師事叅研用其策三
以霸人主乃功成脫屣去毫不芥蒂及三致千
金遍散知交如取如攜又何談之易也丈夫生
世間終黃馘繩牖爲此拘拘者乎則朝持籌暮

下箸偕仲子授蒼頭數輩修里中楮業而息之
以忠信爲輿以禮爲御以徵貴賤通緩急爲左
右筭不數年復先世之故廬業烝烝稱隆矣先
生益自喜爲人條便宜十畫十驗里中有私鬪
者就取平出一二語微中咸解散至聞竒寃異
讞不平事輒髮上指殫力爲計畫務白其枉人
咸神先生料事多中以爲君平復生季主再世
不啻也三族中有長未婚歿未殮貧不支操春

病不給藥餌者悉力應之不少靳而家用日益
饒先生顧自笑曰吾其師少伯而小用之者哉
乃先生未嘗一日廢書旣佐仲子治生而獨以
儒授伯子勲伯子自蚤年餼廩每試高等稱詞
場領袖而先生督訓不衰每得快句駢語急鼓
掌呼伯子趣浮大白勞我也伯子以是愈淹博
號儒林董許云錢之先多以二戴二南相傳而
治易自先生始嗣是昆季子姓皆宗之其以易

起家者爲通許公夢鰲福寧公士鰲及震宗公之子兆元俱先生再從行乃先生所友愛督護者無異同胞宦邸問訊輒以服官大義相勗兩公有疑獄亦輒遣訊先生援古證今立爲剖兩公笑曰四兄千里坐畫勝伯宗乘遽辟傳也當福寧公由蓼守遷刑曹郎州佐墨而束於法不得逞乘公之行也摺摭胥史乾沒狀齟齬公事且莫測先生擇姪兆元有心計密授策被揭兼

程徃凡四越月次第如所指而福寧公之心跡始白及福寧以訃聞先生立遣子勲奔其喪躬爲經紀垣宇樹藉九十太宜人者靡勿至福寧公每稱新陽兄非吾同生顧勝之震宗公亦謂吾五弟季得新陽兄而六矣比五弟季相繼下世先生於生死手足之誼愈老愈真而其視震宗公父子敦愛尤篤自兆元薦賢書文章行誼藉藉人口而喜可知也歲丁酉思家乘殘缺則

初集 卷之五
集諸子姓謂之曰余家自武肅而上有大宗譜
下衍至魏國公有慶系譜及緒山公於表忠觀
剏延賞堂樹碑三欲續圖十一世以至二十五
世宗譜彙修之未果今自山陰遷武林且八世
其間功德歷履可遂泯滅乎是在我閉戶嚴蒐
三歷寒暑始就爲凡例七條生者硃書歿者墨
書婦再適者墨之有賢孝异行者另立傳內外
臚列大多述媿行獎貞節文無褒貶而褒貶具

在埒顏柳家訓焉每春秋展墓未嘗不徃徃必
携宗譜遍識小兒誕日增一兒輒飲滿大快命
名必以彭曰彭篋氏吾所自出也先世有葬地
爲豪家所侵先生以死爭之當道臨以 欽命
不可奪豪家夜半持千金爲壽願易尺土先生
奮挺逐之乃公豈利誘者其人惶恐謝已心識
其高節更爲納交而去蓋先生卓偉遼廓語投
卽飲以和及關係大體有不合又輒厲聲色譙

訶不少讓往往類是矣先生修髯骨挺神明燦射飲不甚多雅嗜飲好賓客酬酢雖不能行好游不善歌好聽人歌里社置酒有召必赴親友有讌會非先生不歡至則傾倒淋漓一坐皆爲引滿每花辰月夕趣命籃輿集山水勝處客或委頓先生出微詞挑之輒擊拳振袂復賈餘勇務畢其歡有一人意未饜不休也西湖春暖買小艇羅內外諸孫十餘輩次第奉觴顏公領孫

三字於鷓首先生緋袍鶴髮掩映桃柳間望之飄飄若神仙中人歲以爲常齋居宴坐左圖右史諸孫中有夙慧者命屬對必沾沾喜賓朋讌晤亦多以儷句爲談謔蓋先生於書無所不窺而聲律俳偶之語尤有專癖每觸景造句如珍錯斲俎爛然盈几所著有四六乘自一字二字至二十四字偶聯錯繡分門別類詳疏源流若干卷以病未就惟遷杭小宗譜十卷五花判瑞

十卷四書義經疏義十二卷表類十六卷藏於
家詩多率意不存稿逝之前三日從弟採薪茶
進床褥間猶口授一律有蓬頭自煮連將啜頓
覺詩脾生五花之句親友問疾必揖手相勞調
以溫語至疾革神氣清條戒諸子勿佞佛勿作
法事痰起取勲手作湯不下三字而瞑噫如先
生者真所謂超然塵埜歸真羽化者哉是歲有
覃恩

詔學宮循廩次恩薦一人先生伯子勲實膺是
典會學使者代未至試後期再兩月先生爲七
十誕辰慶者在閭而脾疾作劇遂俱不能待乃
先生軒襟曠度皎皎如生伯子離經厚蓄逢時
則駕此不足爲先生惜矣勲等卜以癸卯歲二
月九日合葬范村祖塋而命鯨銘其墓銘曰
才能成名亦以危身坐而持籌身名兩亨魯朱
俠隱荆高勇沉過者式閭批難解紛遙遙華胄

燁燁龍文誰握如椽藻績縱橫含章有譽視此
雲仍芸暉不朽我言斯馨

文學茂叔凌季公墓志銘

是歲丙午秋季文學凌茂叔嬰疾逝再越月其
仲兄謙吉率孤陽徵匍匐向鯨絮泣曰弟已矣
弟生平志節實有卓絕自樹者朋儕能言之通
都能信之矣竊願謀所託於吾子覬不與日月
六駸乎益鯨哽咽莫知置對而淚泫泫下也鯨

初識茂叔於媯黨中旣益習其人敦大節重根
本沉婉篤摯耻陰陽上下方與定金石交事無
艱易諮畫若一體而今已矣微仲兄之命能隱
忍片言不使世之操修醇潔者知我茂叔耶且
茂叔茹苦受書不獲自振干霄而僅托之羨石
又不乞諸世之間人而以屬鯨求禮於野貴遇
其真則亦茂叔之素所志也鯨所效於茂叔者
庶幾藉是何敢辭按述茂叔凌姓諱嗣業鴻宇

其號人多以字呼之故稱茂叔凌之先多隱德其占仕籍也自中憲公始而海內推重武林凌氏者實繇太安人貞節著及中憲公有四丈夫子伯今爲廣西太平守仲以鄉試第一成進士用治行 召入爲給諫卒于官叔季俱賢良高等季早逝諸孫蔚起黌宮而郡中之推重凌氏者又以家規雖肅著小大雁行絢綉必飭行於道而知爲凌氏子而友執之推重茂叔者又以

沉至俠烈著茂叔爲司諫公少子母王封孺人最憐愛之獨其至性耿耿自乳哺輒英毅道上方在抱聞王孺人哭其母張也輒哀號不能已中憲公或筮楚諸隸遶膝請必得免始快甫就外傳喜談古今諸史遇忠孝節義事輒色喜間有不平必戰色戟手若有所俟一日仲兄以伏后遇弒事語之忽推案直叫髮上指攘臂幾及兄稍長氣益邁務達其懷不因人撓抑昆季中

遇之無不辟易者迨司諫公官昭陽則與俱之
昭陽蓋朝夕父師者六年所而舞勺舞象步中
采齊視聽必恭訾笑不妄凜如也穆如也則外
束於禮而伉直邁徃之氣益歛而內柵其天和
矣乙酉娶于沈丁亥司諫公訃聞伯仲方走清
源將母而茂叔獨在喪位應賓客之來者鷄骨
幾不支比禫除神理委頓而析理益真律已益
勅旣補邑諸生陸沉十餘年無見知者骯髒無

所發舒愈鼓其獨徃之志而以伉直俠烈自喜
然壹意真慤佐以婉贍終未嘗以氣加人居平
無汎交旣與交無息不願其爲端人君子也有
過必面折之廣譬曲諭務極曉暢甚至處人嫌
隙之間他人咋舌去者悉力爲解或觸人之怒
且詈且謗咋舌去者從旁竊笑之而茂叔不爲
止曰吾業任之矣理之所是何恤乎人言天性
純孝事王孺人唯恐不歡婆婆娑膝下常若嬰兒

孺人間發痰疾憂形於色寢食爲廢事諸父諸
母周詳婉順無異於父若母奉兩兄及群從兄
弟不殊墳麓之合奏也然遇群從中舉事有不
當必譙呵不少貸卽諸父諸母微有異同時進
苦口退而累牘以冀感悟不則輟箸躑躅曰此
衷實有不安也季父歿茂叔周旋諸弟間若已
事諸弟苦二豎早夜撫摩身與同痛仲嫂卽世
日討子若女而訓之以無忘母儀也以至三黨

之親同好之友有急茂叔未嘗不應有疾輒爲
稱水量藥詳營其甘苦有構釁水火必蹈有註
誤引繩批根世之求于茂叔者愈集而茂叔一
一出肝膽酬之愈不給而愈馴習若天性矣仲
姑歸于陳丙申橫被外侮以驚恚暴卒茂叔佐
兩叔率兩姓理之於官悲惋憤激詞極酸烈當
路意有所屬目攝茂叔是青衿耳嗷嗷何爲者
茂叔應聲曰禮昆弟之仇不反兵青衿可奪理

可奪乎當路爲沮事卒得白任勞任怨兩閱月而形神頹頹遂成痞膈之疾所親在仕路有以事干茂叔者峻拒之不爲動間察其理直則轉屬親識中貧不能爨壯不能娶者某某已不受浼人賴以濟婦翁沈倅饒州茂叔戒不往則沈逆之新安邸中微有所托比沈翁歸里中舍茂叔家數匝月脯資餼牽竭矣茂叔度有贖貲務易產以克其數有馬生耄矣以朱文季期茂叔

指一責囑之曰是收余骨旣而責不可收茂叔曰吾忍負此冥冥耶畢事而歸其子噫惜茂叔困于經術足不踰閭耳使擔當險巇發憤公正其推誠篤義亦何減張彥真荀巨伯及韓范諸鉅詰耶今年春下帷攻舉子業三試報罷不自得而爲闈中厲氣所中痞膈乘之六日竟不起疾革白母王孺人及諸父諸從婦若孤一一與訣俱懿行碩語已復嘆曰生死夜旦也無苦亦

無樂但期迫不得一沐浴氣宇冲融毫無怛怖
則茂叔之精心觀理其所洞者豫哉雖然世之
波靡極矣世膽可照世態可描翻覆浮沉如出
一徑若茂叔積愫無歉切惻剖心皎于白雪地
非要而人倚之如長城齒未強而人欽之如師
保力未贍而人給之如衢樽輾轉于名理之衡
斟酌于微茫之際嘔血欲枯壯懷益熾蘭馨膏
燿茂叔能不憊乎其在今日使志茂叔者可以

不愧則茂叔之貽遠矣生隆慶戊辰九月六日
卒萬曆丙午九月八日年僅三十九配沈卽饒
州倅敬堂公女淑慎宜家蓋素敦德耀之敬共
而能代茂叔善撫其孤者也男一陽徵聘宋聖
卿公女柔謹而慧茂叔之所隆施報其在是矣
鯨謹志其大以俟後之司彤管者與不朽終古
焉而系之以銘銘曰
二氣所積維真維直寄之藐軀天地可塞謂季

也弱道氣如虹精鑠而疲遂殞厥躬名位非顯
珠含自耀不泯千秋請質同調

處士孟公暨元配陳孺人合葬墓誌銘

太學孟君禮卿個儻負大志不屑隨俗浮沉落
筆數千言有撝馭八極之想徧參名宿陶石簣
袁中郎鄒臣虎諸公皆收爲入室弟子隸博士
籍有聲久不售入資遊北雍名益噪成均列侯
勲胄子弟執羔鴈延禮卿師席禮卿益發憤不

成名不歸而母夫人訃音至矣袒跣返故里蒲
伏向不佞曰不孝年十八遭先嚴之變礦石尚
虛有所待也今墓木拱矣不孝落拓如昨先慈
將合窆乞片言爲之銘噫禮卿以未及致身青
雲爲憾而因請銘於邁士良可念也何忍辭孟
氏相傳爲亞聖裔宋隆佑太后咸有岱岳之思
處士溫厚淳篤廉也五之元配陳孺人同德齊
莊積資冠閭里爲善不倦有子禮卿夙慧隆禮

者碩亟冀其以詩書耀前後處士卒孺人齋素
四十年不尚綺靡縱禮卿任俠邁爽垂萬金之
橐不問以展其凌霄之志孺人真無媿仇氏矣
公生嘉靖乙酉正月初二日卒萬曆己丑年十
二月初十日孺人生嘉靖戊戌四月初九日卒
萬曆丙辰四月初三日子男一際可太學生娶
奚氏繼李氏女二一適戶侯施大恩次適張欝
俱蚤卒孫男五人長津娶李氏側室儲出次河

娶林氏繼娶施氏奚出次澤娶黃氏儲出次渚
李出天次溪李出未聘孫女五人二夭三存

銘曰富而賈名不出戶貧而儒聲達九衢厚積
幾何所留孰多儒效彌顯先德益彰鸞綉來賁
松楸之藏

有道先生台山王公暨元配翁孺人合葬墓

志銘

外翁台山王公以行誼著於鄉爲善不勌登年

八十一而有嬰兒之色以衰憊考終向苦卜兆
父長史皋亭公四十年尚在淺土公季弟經衛
玄山公歸營新阡合葬考若妣而以公祔并啓
元配翁孺人攢合窆焉公遺言勿外索諛令孺
子鯨數語道吾真足矣夫卑者執筆尊者靈貺
而辟呬詔之非鯨志公也公實自爲志耳已公
諱介字以和台山其號世居錢塘芝松里洪武
初有諱復者爲里正繇作京師戍柳州當行避

逅以子斌代斌死葬於柳斌子曰銘乃居錢塘
長子孫至勁菴居士祥積貲治詩書漸有聲賢
豪間矣弟祺仕爲延平府同知無嗣撫祥之子
軒躬督誨之受春秋膺貢旣謁學博選翩然返
棹吳泉亭先生鼎銘其墓文待詔徵仲書軒生
元卽長史皋亭公生三子而公其長也皋亭公
倜儻豪爽掄貢最早由當塗司訓漸至左長史
進階四品服所交多海內名碩吳明卿張助甫

俱臭味莫逆

藩王列侯子兩臺輜軒使者爭交驩王長史而
元配張恭人爲松菴公女習尚豪華裘馬庖饌
俱內家秘法公生雖儒素所聞見九醞八珍不
知世有田舍齏粥之味長史公有妹適姚江錢
後峰以省元登進士授柱史而公妹適凌二洲
公亦以省元登進士拜禮科給事中一妹適姚
江陳檢吾亦以膺貢擢長史晉階如舅官公徃

來俱冠紳視青紫若固有之以春秋隸錢塘博
士弟子員試輒高等五入棘闈不售無所發舒
而好學嗜書不間寒暑皋亭公居大梁羸於出
而詘於入旅襯歸靡爲所田園計者公之篤親
知勤餽遺性自樂此不能盡減家益落而難蒞
尚有舊日風氣閒庭無事手白太傅詩高吟數
過客至命觴陶然自適而已嘗言人生不可無
五友探幽訪勝爲山水之交紬繹今古爲文字

之交昏夜扣門爲緩急之交高談浩歌爲花月
之交持危扶顛爲患難之交而公所與總角游
至老無間也歲時伏臘修祀事極虔迎主於廟
澈而燕私有古楚茨遺軌焉遇攬揆之辰集中
表諸甥飲必歡洽投老食貧屐愈健神愈王飲
噉倍於壯夫興趣不殊年少而談鋒蔚起自辰
迨晚不休及老疾不能行童子擔繩床出入庭
宇談益健至不必酬對自問自荅而新舊悲喜

若臚傳矣體素瘠親友皆虞其無年公不講於
養生而心事開爽過而不留有言喀喀必吐乃
已安心行善勸孝勸慈遇者皆欽爲有道而德
範粹容藹如也曾有一小鬟黔國公購以明珠
托他姓業成約矣公廉知當行萬里急冒雨返
其值女卒歸良士憐恤乳獨寬然養恬卽病榻
而勸人善言暖於布帛尤時時強之飲強之歌
至彌留無恐怖如燈之漸滅其直腸坦衷毫無

襃積壽臻耄耋非以此哉元配翁爲仁和西冷
公女西冷公富而好行其德咸推長者孺人孝
敬溫恭操作勤敏皋亭公曳裾王門者三十餘
年置副室長子孫而太恭人汪恭人張老不能
從孺人色養惟謹朝夕奉甘膳不以窮乏爲解
最得兩恭人歡心汪恭人年八十餘張恭人年
七十餘始捐棄佐公喪葬如禮見家之外腹中
枵也務節儉爲群下先脫簪珥贖田計永久歲

入必分餉陸氏姑久而弗替公久未有子蚤置
媵旦夕虔禱幸生男以寬已辜公清癯鶴立多
方調護如保嬰赤飲食非躬治不進盤餐餘粒
不入已口朝夕憂公之家與公之身經營勞瘁
家與身賴以安全而一疾卒不起才三十有九
耳孺人艱於子女與兄中憲鑑塘公嫂張恭人
情好最洽恭人螽斯詵詵最後有身孺人祝曰
若男耶嫂子也若女耶吾女之恭人唯唯果得

女卽以乳媪進甘苦燥濕無息不與俱遇疾疹
必仰天叩首得無吾命不宜女爲女累耶能飲
食始進飲食居常教之書笈讀經史見慧婉輒
色喜然不以姑息廢繩矩蓋女年十四失孺人
又五年藉翁子先季鷹文章道義之知始于歸
不佞鯨又十四年孺人之姪獻甫子先始相繼
成進士俱拜二千石兄與嫂累受
誥贈不佞鯨榆枋之飛已酉登應天賢書俱足

慰孺人夜臺者而公之教誨拊摩彌久彌篤令
女忘其非公出亦足徵公之慈愛根心推誠不
二者矣公生丁酉十月三日卒丁巳五月二十
五日享年八十有一孺人生巳亥三月六日卒
丁丑五月二十二日享年三十有九女一配鯨
繼配葉孺人生子女各一子嗣昌娶海昌文學
徐靈源公女逝女一配邑庠生莫雲逵孫女未
字嗣昌於丁巳十月二十八日啓孺人攢室合

壙不佞鯨敬述公之志而系以銘銘曰
公之先世以儒顯而儒行淳備不爲晦公之配
莫遂偕老而異室同穴不爲夭蓋以德音爲大
年以神理爲火傳子孫綿延視此鬱葱之新阡
孝恭邵婦楊孺人墓志銘

孺人楊氏世居仁和似蘭里父海泉公大經母
鄭氏初苦約以積楮起家不侵然諾名著齊魯
燕趙間貲不減計然生六女孺人最少父母憐

愛之不欲出里閨而文學邵幼和先生爲興化
二守會和公長子博洽善古文辭道行高潔蕤
林欽事之其仲子明字士熙端雅士也楊之婿
徐太學見可爲邵門人同里錢孝廉長人爲邵
小友遂聯兩家之好孺人年十九士熙稱贅婿
云孺人性極孝婉嫕膝前柔愿曲當九歲知持
齋禮懺以報親三載漸疴瘠母再三慰勸稍進
一筋然終身蔬食居半至母喪誓不茹腥歲時

哀號至危病無替久近矣自幼恭謹習女紅超
其女伴不以先人率已勤儉百務勞動任之若
飴母橐雖克必不以統綺累母朝夕畦蔬遇甘
麩奉尊人及舅姑始及夫子而至擊鮮娛賓則
難臞皆出新裁極精整稱郇鯖力珍矣海泉公
晚得一子孺人時時調護甘酸寒暖不厯餘力
復念其弱植宜卜儒門女足以正爾志肅爾儀
廣爾聞見中憲湯隣初先生規範清穆海內爭

望之如喬松翥鶴因從史舅氏求其孫女自委
禽至成婚孺人殫計精密向爲母筦鑰噐什盡
歸弟婦矢不私一匱寸鏤焉然海泉雖素封乎
瓜瓞相仍篳路之風尚在自士熙入室徐爲立
規模雍容都雅遠聯姻聲教漸開益彬彬禮樂
之場不徒以闡闡雄矣乃睨之者卒以此百念
叢起卽海泉公亦曰吾新豐可娛也孺人內自
傷外復戒心哭母之後繼以多難病歲餘遂不

起彌留先一日迎舅至謝慰楚楚對老父幼弟
諸姊以及減獲一一語皆欵厚無非爲士熙計
虞有以其存歿二心者部署遺篋作梵唄而逝
時萬曆丙辰二月廿九日午時距生萬曆壬午
七月廿七日亥時年僅三十五女一未字不佞
與幼和公稱外家中表以意氣相許而孺人與
吾內人朝夕通聞問敦悃誠每傾肝膽皆孝友
大節慤恭純矩真可敬可法非閨中凡庸質也

孀黨私謚之曰孝恭不虛矣士熙將以某年月
日從其母沈淑人葬積慶山先兆而邁史氏爲
志系之以銘銘曰

母懷之三年而竭至念祈福田父撫之三十五
年而培弱弟立大閑其識卓其志堅其德媿其
名傳而孰云無年

龍泓石林果禪師墓碣

龍泓泉石幽竒與鷲峰分王南北宋辨才大師

法席之盛垂耀千古爲海內瞻仰入

國朝遜興遜廢名跡沒靡蕪中敗龕歆宇磨磨
寢處其下吊古之屐罕至而鼎新二百年來未
有勝因實自石林果禪師始師諱真果德周其
字別號石林本仁和蔡氏子其父以艱嗣禱於
神母周媪夢異人賜桃一枚遂誕師三歲而孤
奉母孝嘗兩割股療母病夙心皈依大乘喪葬
畢卽辭家遍訪耆宿初游雙徑萬松和上首傳

法于天香幻泊禪師抽簪落髮持律精苦萬曆
丙子陳柳菴中丞廉其行延入住持龍泓師作
屏菑翳攘剔椐榿甃石疏泉稍通樵豎然半椽
不蔽風雨師星旦焚修矢志興復每對佛隕涕
願以身殉雖大寒劇暑惡糲重簷難堪之役甘
之若飴三數年漸有鐘鼓之聲香鐙梵鉢交於
境外矣馮開之太史過寺喜其朴忠亟獎成之
每事護持不靳纖細首爲清復原額山田四方

游士亦漸集龍泓之名始聞冠紳聞而孫東瀛
司禮一見欣然鳩工庀理翠簷飛閣碧礎流虹
巘趾琪亭雲根曲水松鈴濤籟喧聞數里至者
詫爲海上三山雲中十二樓何年移泊於此而
不知頽落之境倏忽易昨實師戒苦念貞拮据
經畫平地九仞良不易也顧游履不必韻士肩
摩踵接肉陵酒澁烟靄所不能洗而師旣償初
願亦亟欲謝去之矣丙申杖笠叅五臺雁宕多

名公贈言歸構一室屏戶獨居朝夕焚誦不殊
壯時知交偶過談無生津津色喜不復問寺中
酬應尋善病善起而投鉅任勤未嘗不甘卽所
難堪毫無骯疲蓋師生平於辛苦艱難習久成
性發堅猛力作功德海自非虛聲棒喝爲渡江
救饑者可同語也迄今名勝肇興聿成偉績豈
偶然哉師生某年月日歿於丁未閏六月廿五
日世壽六十有六僧臘四十年醇謹篤行疆幹

初集 卷之五
和衆遠近稱爲都維那乘化條然不挂一念弟子如誠如瑛如理恪守先訓真所稱大壹小壹以此覘龍泓法席當益隆矣

光祿少卿小江吳公暨配宜人高氏行狀

公諱果字行甫別號小江出延州吳季子札之後唐宋間多聞人建炎中扈蹕南遷遂居錢唐入國朝靜菴公文貴生子士寧士寧生誠登景泰辛未進士官都御史得封兩世如其官士

寧長子謙授將仕郎謙生璿松江府同知璿生源稱龍江先生登嘉靖戊戌進士官江西憲副則公父也母陸封恭人姪公時已先兩舉子能勝衣冠矣將墮以刀圭夜夢老叟擲果其懷中曰勿謂上林花木盛枝頭一果却希奇覺而疑之因舉公遂以命名旣而先舉兩子俱蚤世無出夢蓋異兆云公生英雋秀爽姿貌魁梧每行可蔭數人四歲能句讀六歲屬對給捷憲副公

絕愛之携之長安每命出肅客占對不展思客以方孫齊莊兄弟宮賓見滄茅公異之許字以長女稍長習博士言爲文珣雅務澤於理尤篤志節每時日所爲必載諸版識鉛朱喻糜其下如白黑豆之警時在江右臬憲東松黃公見而嘆曰十五書生討伊洛衣鉢抑何偉歟暇輒旁蒐古彝鼎縹帙博綜不倦尤工書法自師宜官魏晉以下籀蹟具設聲雀起十七由閩中歸赴

督學試後期旣爲按君所收遂以第三應試棘闈尋隸邑博士弟子籍是年十九當授室而茅公所許女蚤逝因聘高氏後以公貴歷封稱宜人大學士文端高公儀女也母鍾夫人生宜人婉嫕貞淑夙閑姆訓文端公不輕字統縉子廉公倜儻有奇幹稱明經因歸公年甫十七卽以操筦鑰佐中外惟謹公有所舉屬率愜其意每客至趣供帳徵歌選舞卜晝達夜公仰顏爲客

初集
歡而宜人擊牛酒戒緝御旦夕無靳色蓋公素
端恪然節俠好客固自天性宗黨友執待公舉
火者若而家有告必給再三不厭乃宜人復佐
公行義歲時賑遺粟帛如流水而客益滿幸舍
欣有魚人人以爲孔北海陳孟公孰如吳公子
夫婦賢矣比應省試不售因入貲游北雍而宜
人亦以念文端故則偕之北客長安者聞公至
咸自稱荆高之侶肩摩而前願一當公子公一

一與交驩戶屢相錯有沈某者輸粟至京卽病
居停無內病者公延與同舍爲稱水量藥代只
文移入太學事竣而竟以首丘思歸歸且垂橐
公緘金數餅授使者曰而主幸亡恙金歸吾家
不則發緘可供緩急也涕泣送之抵京口竟卒
賴橐金得歸覩毛某名家子也客居燕數從公
游顧貧甚又病久愈落穆京都貴人無過問者
所携一妾一襁褓女幾不辨朝夕公心憐之爲

給薪米使不乏所居一椽稱質凡數姓爭撼毛
生公立散百餘金代償子母毛感泣叩牀願死
之日以妾供箕箒公毅然作色曰急人之危而
乘其危寧復有人理耶已爲經紀其喪舉女與
族人而歸其聘金于妾遣介護之還妾請償前
費公寸銖不許姚江翁生者其弟曾爲公塾師
因乞貸三百金之任衛輝府幕不兩月計至塾
師皇恐請券願星夜馳往得當以報公公固拒

曰遠方旅襯糶糶在厄徵固無益也卽急徵何
以慰孤魄亦豈公鶴鳩之誼耶立檢券將就火
塾師攫券益力公察其色動卒焚之里中文學
孫某其墓壠爲隣豪所侵公立捐數十金爲取
償乃已其他慷慨市義晷不暇應公蓋卓犖赴
急率真根性而宜人佐以慈惠人咸稱雲霄高
義實相副云癸丑憲副公致政歸公與宜人就
子舍日候起居占色笑以爲愉快復圖所爲憲

初集 卷之五
副夫婦滄洲之娛者集家僮作劇每稱堂上觴
輒奏陽阿之歌絳樹之舞左右衿芟茄被芙蓉
設蜺幃絹帷旦夕爲樂諸賓客日益進彈碁蹋
踰聞鷄擊筑酒酣獻伎次第畢殫以至李思訓
吳道玄之流千里願投公所列脯鮪桂蠹玉屑
瓊晶饜客意以供憲副公開燕如是者十載戊
午陸恭人逝辛酉憲副公逝公居兩喪毀瘠踰
常人當憲副公之易簣也公承憲副命勉赴畿

試未歸時施幙巾殮矣宜人號慟

於家長曰

大人兒終天之恨其在今日儻去此遠妾死
奚贖願少緩湏臾以及殮期是夕公適至蓋公
於徐沛間聞病報遂兼程七晝夜得抵家進飯
視含衽身誠信人咸謂公之急奔與宜人之緩
殮其天報純孝哉故相江陵張公者憲副公權
荆時所舉士也與公同席視交歡甚乂及憲副
下世後江陵入政府思報德數書召公公時奔

文端公喪入京因堅留之公毅不可歸而書來
促行甚切宜人從容勸駕曰君才何艱一第乃
三試不售售復再蹶奈司命何則曷爲雌伏牖
下也趣飾裝促公赴江陵召遂得以中翰給事
殿庭乃宜人不半載逝矣當文端謝世時宜人
過毀嘔血數升已負病然恐憑公行也閔不使
聞旣大潰遂不起遺書諄諄勵公就功名且指
所生子大山爲託山卽孝廉仁仲時甫落齒然

已崢嶸露頭角矣公聞哀慟如失指臂亟公吹
請告歸里襄事如禮而終身不更娶以報宜人
佐德焉旣服官江陵方顯赫用事事無大小懸
於相君相君甚貴倨每公僚六曹九列伏謁道
旁莫敢仰視相君獨引公裾入與道舊故相得
驩甚顧公益著謹恪退抑若不勝自公庭長揖
外不妄造其門卽燕見不一語關政事有暮夜
投金者亟謝絕曰吾非夜半客豈受若夜半金

且吾爲貲郎洵輕然爲
天子重臣則已溢分爲丞相幕賓則又輕矣語
漸聞相君愈欽禮之相爲引重而公俠烈振急
起人於厄不殊平生終不以相君故有幾微介
言色人人交驩如飲醇醪後數年江陵敗多有
以槐柳被譴者獨少司寇劉公及公最眷注而
禍不及公旣佐秘閣久洞晰典故及累朝因革
事宜服色正朔無不探討後先執政交倚公如

長城多所諮議公復諳練大體明決機宜每有
陳說執政必稱善傾注彌切時或侃侃獻可替
否毅不可奪相君必降顏容之而公居心恬夷
褻躬冰蘖人有千諤出必三緘蓋先後如一日
已文淵閣者

上所藏尚書府

高皇帝御書諸草在焉日久漸蝕同事者欲以
蟬餘付燼公執不可曰是

祖宗家法比於赤刀天球而可漫視之耶效李
克分別四類篇加釋義哀然琅函之舊矣政府
疏進

上嘉納因念列聖懿行之在載乘者命宰臣更
進副草公進議曰此未易爾爾故事正史藏
禁中而纂修攷證實籍副草有如公式
乙覽未周久不虞廢閣乎聞之嘉靖亦嘗取諸
閣臣閣臣別錄以進見及此耳且爲今日計祇

宜先錄

永昭二陵以上有舊錄可仍也政府躐之比訪
前事信然而嘉靖初所進盡屬烏有由是愈重
公明練有識矣御史某者以直諫忤

上怒欲杖之宰臣九請解而某給事復論掇
語益切疏入矣白副封西省諸公錯愕曰是上
激君父以累其明而重其御史之罪也萬一聖
意不可測如國體何皇遽莫知所出飛召公公

時已出省亟促之至語所以公曰封事上未曰
上矣欲䟽請解乎曰然公曰今日爲某御史力
抆者二三執政也明日爲某給諫請命者又二
三執政也亡論瀆聽不虞身爲黨乎事急矣請
急見司禮封還詞頭遂去越禁門數重達直舍
備稱諸相公彌違聖德保全諫臣意諸璫有難
色公持論娓娓數千言氣愈壯乃得發前䟽歸
報相君相君大喜曰微吳君朝廷又多一番事

矣大司寇每議秋辟必三覆始卽刑會內璫票
旨適註誤始曰會官處決繼又曰會官審決當
事者首鼠難定計東曹豈鞠讞時耶遣他簿史
往返三四不辨而賴公數語得卒事其他有地
隣禁宸務關密勿公不敢盡言人亦不能盡知
然倉卒間立剖三大事亦足見公矣至若急李
拾遺之難拊王廷尉之孤與凡需次公車者蹒
跚下僚者公力有可爲百計獎助此又節俠素

性非博爲名高者也公在朝二十年委蛇處錫
不事躁進而後先
寵眷倍踰常格甲戌秋
穆廟實錄成賜白金文綺宴於儀曹丙子題修
大明會典丁丑秋
世廟實錄成陞大理寺評事賜白金文綺宴禮
如額庚辰春題
誥勅房辦事克

殿試彌封官官如故辛巳題翰林院典籍隨以
冊封諸妃禮成賜白金一鎰大紅雲羅一表裏
故事大僚始得服雲羅郎官蒙此蓋異數也先
後以

覃恩一秩滿一追贈憲副公中憲大夫母陸稱
恭人配高兩爲孺人云丁亥

大明會典成陞禮部祠祭司員外郎宴賜如初
庚寅五品秩滿授階奉直大夫贈配高稱宜人

尋以累朝訓錄成晉郎中加四品俸癸巳陸光
祿寺少卿加俸如故甲午進呈
玉牒仍以少卿加正四品服俸其間蒙

恩賚者十七賜宴者九扈蹕者再陪祀者十餘
郎官之榮可謂極都而公居恒言身數竒一第
業陸沉金馬儻脂韋突梯以希顏色固士君子
所羞稱卽坐嘯畫諾不乘時有所建明亦空負
七尺耳以故砥行礪節錚錚飭廉隅較諸生時

益著歲乙未公念齒已過耆自投劾政府強留
之不得脫尋奉命督催歲輸歸里丁酉冬遂力
求致政始得請而先是辛卯公之子仁仲亦已
登順天賢書博古洽聞名藉甚海內矣兩子壻
又皆就徵公車公喜曰是吾所爲慰高宜人於
泉臺者也吾懸車其有藉乎公素敦友于高宜
人輔以輯睦宏先公葛藟之蔭分田授室屢躋
屢培而鄧林蔽天頰爲寢丘公對之飲泣然絕

不出口會展墓集三黨之親出積俸若干分贈
逮遍而尤倍施於窶者已悉力營山園仁仲復
佐公經度馭娑枵詣參入雲表琪花名卉燦射
左右每佳風日及公初度仁仲輒載酒前導音
樂協奏公竹冠縵服一再霑醉旣而故人客子
稍稍來集擊鮮供具優伶雜陳無日不歡蓋仁
仲所設朝晷宿鷄徵歌妙舞以娛公者亦如公
之娛憲副公夫婦時也鄉居七年足跡不至公

府郡請賓飲公五當祭酒而一疾卒不起爲萬
曆辛丑二月十五日暨其生嘉靖癸巳七月十
九日享年六十有九高宜人人生嘉靖乙未十月
初四卒萬曆甲戌五月廿一年四十先逝子男
六長大嵩側出爲後于伯氏次孝廉大山宜人
出娶于孫山西叅政枝女繼亦孫登仕郎椿女
俱卒次大崙大崙大崙大崙大崙大崙大崙大崙
生娶于茅督府經歷藉吉女大崙郡庠生娶于

裘上林丞大有女大對娶于陳舜枝女大岑娶
于茅亦藉吉女女二宜人出長適孝廉周大毅
次適孝廉錢養庶孫男三大山子遠大嶽子觀
大崙子超孫女三長適沈宗培大山出餘幼當
庚子冬仁仲之與偕計也念公春秋高不欲往
公毅然促之行至嘉平望後始發公時尚健七
箸比仁仲待策忽心動還車沛中而公訃至矣
仁仲哭踊幾殞則匍伏手行實泣對鯨曰山所

不卽死者惟是羨門之石爲先子不朽計耳無
徵不信將丐子一言以徵諸名太史蓋不佞鯨
與仁仲交十五年許以文行相砥投好頗篤且
居同里得奉公杖屨核公行莫不佞若也以不
佞所覩記公慷慨任俠推金市義如魯朱家季
心而無其徼公索譽之嫌賓客過從傾筐倒屣
如翟公鄭莊而無其翻覆設羅之薄孝友恪慎
舉事詳密如石慶倪寬而無其免冠請讓之苛

諸子玉立承意娛適如陸大夫而無其劔服車
騎移徙約誓之勞身處脂膏貪泉不軟砥志堅
白施不計報冲夷善退以保全功名自少迨老
殫樂極歡而諸子競爽雲蒸霞變氣象方新如
公者蓋備有燉德亦享諸全福者也不佞不敢
以文揜質惟 名太史徵其實以錫之一言吳
氏世子孫不朽矣

誥封太宜人錢太母孫氏行狀

萬曆庚子陽月十三日錢太母孫太宜人享壽
九十有二考終越期長孫兆元暨冢孫兆雄輩
將啓贈公中羨合壙焉卜有期矣元過鯨稽首
絮泣曰痛哉王母元之不逮以鐘鼎養也元之
不獲侍飯啗施禮衣也元號天奚贖今將謀爲
壙石之銘當述懿行以請而元忤乎望王母之
帷而目瞿也纍纍乎哀王母復哀吾父及諸父
凡五而無一逮哭泣之位也執筆眩悸元號天

奚贖耶言畢而慟繼之以踊則不肖鯨拭淚應
曰太宜人懿行鯨竊識之鯨母出於孫於太宜
人爲女姪鯨固諸孫行也卑者操辭以供尊者
之役是在鯨矣於是哀元所口授及夙昔所覩
聞者次第其概爲太宜人狀太宜人孫氏先世
系龍門始祖郡伯公學有子智同徙居錢塘江
澣歷七世至朴菴公明代著隱德配斯孺人生
二女五男而太宜人稱仲女方斯媪之姪太宜
人也元旦夢我冠紫袍者授五色奇花一枝云
當得福壽女復授一桃云當得清貴子更祝曰
善藏之穩取百三十五年受用是歲果生太宜
人越十載生子襟江公懋績學有道術壽五十
二卒兗州司訓司訓雖末秩而以清節高行稱
聞人至今合兩甲子實百三十五年蓋奇兆云
太宜人生端凝厚重笑訾不妄雖處焚囂多靜
默面時帶歡容和而實諍翁媪絕憐愛之時朴

菴公生計方繁盛早作晏息太宜人以時佐翁
食飲服御稍長撫幼弟毫不煩斯媪心甫八齡
見隣女窺窓而感如墜江狀太宜人急持之問
故云失主母金簪願捐生避撻楚太宜人牽衣
慰曰無恐吾代爲若償而斯媪色難之太宜人
廢飲食淚殷於褥翁媪大詫扣其意欲以佩珥
償如所請始釋其天性慈惠如此年十八歸於
錢錢出武肅裔自叅政公述以下代多冠側注

肄業學官者而贈公鳳泉先生濂獨不習儒乃
其行工爲懦弱不好弄居幽隱無昵狎及見太
宜人愿慤益相肅如敬仲之饁顧性伉直惡無
禮及遇不平事輒髮上指睨柱自擊欲亟爲白
而太宜人不爲動徐徐理溫語解之贈公又輒
開顏謝曰以韋濟弦蠲危滌愆婦其贊我哉益
相欽終身無間言贈公父曰慎齋公當贈公授
室時已謝政母楊孺人八十餘臥病五載矣則

初集 卷之五 五
太宜人佐贈公任家督晨夕上慎齋公甘麗惟
謹而以身掖病姑寢食溲溺俱手承之楊德太
宜人甚垂絕呼之不置卒斃於太宜人懷中尋
遵遺命飭奩具嫁姑之愛女於成蓋先後治兩
喪易戚俱備使贈公無憾於爲子者太宜人力
也贈公有兄松泉公湘困博士籍無以爲子女
計而弟海泉公淞多子女蚤失慈太宜人一一
撫之棗脯菰藟飼飴畢洽女弟適成者其夫富

而駭喜以金錢彈人而觀其辟丸家立窘太宜
人惻然徙成夫婦歸別宅膳養終身更爲歛葬
視其兩子三十年如一日又時時周餽戚里之
告乏者舉贈公所欲爲要不必贈公唱也顧贈
公善爲人緩急而不善治生太宜人凡五舉男
二舉女家指益饒計中圯漸不支矣太宜人脫
簪珥克之隨克隨罄贈公中夜勃鬱聲叱咤可
奈何而太宜人怡然貌加豐慰贈公曰是膝下

亭亭立者非生計耶贈公首肯久之乃五丈夫
子尋皆崢嶸樹門閥矣長賓樓公雲鰲率先操
作次麓池公夢鰲年十四補諸生嗜古籍其次
竹樓公起鰲十六握筭有心計不數年三致千
金次月樓公冲鰲馴良雁行而最後爲麓屏公
士鰲才名正熾每出入望之如玉山人咸爲贈
公加額而太宜人不色喜緝緝筦鑰日循循靜
治以爲常旣贈公及太宜人春秋日益富丙子

仲子預計偕叔子拓屋宇規堂構壻女歸省內
外孫彬彬屨戶外滿筐篚羔鴈之羅堂下者氣
如歆蒸每旦夕諸子婦鞞蔽膝席跽上食諸孫
奉觴觴贈公惟恐失容而太宜人坦然怡怡相
問勞服勤靜治不殊中地時也比贈公卽世太
宜人乃不復問戶內事坐居默坐晏如而已壬
午季復登賢書丙戌成進士而仲亦已謁選得
通許令先後捷音至人咸覘太宜人得無沾沾

見眉睫乎而太宜人聞報輒領之齋居嘿坐晏
如而已季公又心念太宜人亟請歸侍築弄雛
軒舞斑斕其中適太宜人壽八十筐篚羔鴈倍
疇昔焉學士大夫爭出詩歌稱慶季公彙爲集
題曰咏壽篇而自稱曰高堂小兒戚里咸榮之
旣除六安守則促叔兄奉太宜人之二安是歲
己丑太宜人八十三矣涉江遭風浪舟子辟易
太宜人獨倚艦觀巨浸以爲戲甫至境季公郊

迎百里外手挽車之官舍州人士爭肩摩踵趺
望見太宜人酡顏皓髮媪粲可掬咸舉手藉額
曰此現在佛也何必鹿苑曇林耶居六朝夕茹
素啜粥每焚香告天曰願留不盡以貽子孫時
六苦旱季公禱雨甚虔太宜人亦虔禱隨得甘
澍喜曰此一方民有生矣季公念六士久不售
議拓費宮而敞之是日久陰霾忽朝旭燦射太
宜人時方臥聞鼓吹廉得故躍起曰吾兒每退

食必稱六有材茲天其開之乎日夕見所行有
善政輒津津喜趣命竹樓公及季公着綠衣歌
舞膝前以爲樂而通許公板輿尋至矣太宜人
欣然欲往季公固止之太宜人笑謂曰見虞我
不任登涉乎吾固堪之雖然在此猶在彼趣竹
樓公曰見代母往仲見見猶見母也且吾聞仲
爲吏廉此足奉母歡矣奚必釜匱爲乃竹樓公
心念太宜人仍返六奉以歸而陶陶樂也越一

載庚寅通許公報最

贈鳳泉公通許令母孫

封太孺人又二載壬辰六安公報最晉贈公如
其官母孫加太宜人方是時仲季服官著令績
所至樹德而竹樓公家居陰行善饑予糜寒予
纊僵予棺爭願爲太宜人祈壽太宜人亦極會
諸子心諸子婦孫婦又無不當太宜人心者然
太宜人無他嗜好獨喜以微詞博笑時時婆婆
庭几間見子女至笑而迎之語多恢諧雖減奚

賤隸人人以爲太宜人親已每款語至移日蓋
極備人倫之樂矣未幾通許公夫婦卒於官賓
樓公及女歸馬者旣先數歲逝月樓公復繼之
人咸爲太宜人畫傷而太宜人遇於一哀而止
亦不甚芥蒂坐晏如而已甲午孫兆元
薦順天鄉書歸奉觴上壽人又以是娛太宜人
而太宜人一再爲加爵澹如也及季公之繇刑
曹郎出知福寧也堅欲留養而太宜人力督之

往往輒欲乞休太宜人再貽書阻之乃不兩朞
而竹樓公及季公又後先逝所舉七乳僅女歸
沈者一發婦在耳蓋太宜人所親歷如春華秋
萎四時之變遞設而太宜人亦一哀而止澹如
也丁酉壽九十諸內外姻屢相錯咸願望見太
宜人太宜人一一延接嫣然玉齒各以好語酬
之曲達其歡人人爲飲滿私相謂曰太宜人神
明彌茂壽未艾也蓋逝之日得筭九十有三去

期願不遠而人猶訝其不符所見若數化云太
宜人素無恙庚子春孫兆元治裝北上有日矣
而太宜人忽病痰時裝已發元遂遣伴往而獨
身留侍太宜人每日夜諸孫更番入直不一月
肅爽如平時既而知元之所以留也時督之上
道曰吾尚及見而春宮報而虞我耄耶元不得
已以秋仲發行而太宜人竟不待矣臨逝無諸
痛楚第多笑姻睦入問疾者猶命坐命茶笑凡

三日而絕蓋太宜人生平大概如此雖然以鯨
所覩記此未足盡太宜人也太宜人實類有道
者語曰視聽運動天也聰明智慮人也鯨竊覩
壺範有綦美者矣不乃以聰明智識參乎若太
宜人和以天倪合諸自然則非有道不至是太
宜人讀班惠女誠大戴內則而提身造事動
叶法度外極悃樸中實了解行年大耋曾無過
端不祠鍼神擅紅績而操絰執線臨老不衰不

譙呵持門戶博內助聲而左右贈公務調於適
不襲京陵母規陳設教戒而子女競爽咸與身
符不著和丸斷織之譽而書聲夜課譽髦斯士
不嗃嗃東下椎鍛榜檠而諸婦諸孫婦崇慈崇
儉咸稟規律不務好施名徼人見德而寸縷半
銖有輒予人以盡爲度不修容勵色而披衷見
素佻子歛襟不飾博大鎮靜之狀而怒不至詈
笑不至矧和風所披萬物皆春不佞佛不信師

巫而慈忍惜福現在方便見者讚歎如見如來
不講於知足不辱知止不殆之旨而門庭薰灼
略不加喜身處穠艷對境俱忘不習聞空花泡
影火傳薪盡之說而割心之痛了不加戚骨肉
凋瘵都不關情不諳長生久視吐納呼吸之方
而齒固形堅視聽不爽色如渥丹無異嬰兒抱
朴子曰外物以累心不存神炁以醇白獨著如
太宜人者過念卽空當前如寄內無煎熬外無

猶奪行履便便幾登大季謂太宜人非天授有道疇能信哉鯨又聞福寧公之自京都歸也見所飭神荼鬱壘者太華命涑之而鄭宜人陰護以楮是夜兩金甲神踞太宜人榻前曰爲令子守門迺至見掩寤而問福寧公鄭宜人悉其詳始相詫去楮肅衣冠祀之兩金甲神是夜復告謝太宜人倘亦醇白內葆神先來告竒花之兆信不誣矣惟

當代名公錫之一言元等不朽其在千百年之後文與太宜人亦皆不朽幸甚

闕叅軍元配陳孺人行狀

歐陽子有曰祭之豐何如養之薄也痛哉不穀有懷二人每拊心於斯言而迺今於闕生中立益恫焉盡傷不置中立離母陳孺人左右八年矣陳孺人春秋方富其奉叅軍日夜冀得當歸一撫子女而奄忽蚤世中立卒不得侍藥視含

痛徹九死烝烝走萬里外護櫬以歸出顛連悲
慟之中計無所之而謀爲母氏不朽計又自念
貧士何德以徼惠文人死且不瞑嗚呼今日卽
鏤金勒石何當於養哉中立嘗從余受詩矣無
母何恃廢讀涕洟念不能已迺復奉叅軍之命
丐不穀狀而藉以遍求文人之銘痛哉此其中
烏可思也因詢中立之言而論次之孺人之父
陳其姓爲東橋公麒世稱謝溪著族母金不舉

丈夫子舉丈夫而笄者爲孺人因聚其愛以鍾
於孺人而孺人不以愛故自逸習苦作勞躬貽
以肄蠶績刺繡日兢兢奏著也幼不閑於詩書
閑於禮婉孌貞靜不必保傳而悉協內則其所
默符詩書獨多旣入門脯修奉堂上堂上爲守
愚公世臣姑李念孺人父母所憐愛不宜習勞
苦每事身爲代而孺人每事身爲請日夕不休
曰伏習象神逸非嬾習也入室而事叅軍廷詔

肅甚未嘗以燕昵褻狎見叅軍不工爲儒從事
藩司稱文無害孺人代共具堂上備甘膳無不
當指守愚公爲四方居亭主屨戶外滿晨起至
丙夜呼供帳無停晷孺人從容應之悉并整而
身自厭粗糲至遇減獲多所惠賚粒米絲枲率
以身先之竭日夜之力以拮据育鞠見些窳者
殷殷誨之若乃不自奮戶樞不朽寧以運動爲
列生耶旣得子若女所提督一如其自爲督者

問堂上及治具外輒跽十指修業而息之一以
爲絰裳一以爲絢屨指以代耕獲多而指爲裂
也顧孺人躬自儉損一不遇紈綺列異膳焚枯
削稿歲以爲常從力所出自已而獲之者卒不
一以嘗已而大體獨嫻至每祀先必豐潔初喪
姑李事繼姑楊如李禮意周洽至今無少渝守
愚公逝孺人佐叅軍喪葬中禮督諸子塾讀務
腆人有急投之輒應卽負責不復問諸內外群

從無不沾沾待舉火者噫溪刻逸士闇於親戚
上下之倫孺人卽不儒有多於儒者矣叅軍旣
入燕則偕而之燕以謁選得龍門衛則偕而之
龍門龍門爲宣府邊徼與群獠襍處叅軍什一
在內什九在外問諸酋及戎士疾苦孺人多獨
居則無時不念吾母金吾姑楊及諸子女若而
人輒淚泫泫下也得家報舉內外孫若而人則
又喜且涕吾安得一拊摩袖棗栗啖之哉顧內

念叅軍去家遠間關勞頓不欲傷其意每善顏
相對病且革猶不欲令叅軍知其長君適至一
一詢吾母吾姑吾子女及內外孫某某長爲歛
歛而病結不復支越月遂不起特呼吾母者三
而歿嗚呼悲矣如孺人者服勤不替其躬儉德
悉諳於禮莊肅靜治以佐其家盡瘁率先以貽
其後豈非金章玉式者哉獨其課子以儒駸駸
著博士聲日起謂樹立可埃而卒不逮嗚呼痛

初集 卷之五 六十一
哉中立所以椎心嘔血而告哀於仁者之前也
伏惟憐而銘之見似心瞿不穀實有隱恫焉且
於闕稱世講敢固以請

沈母莫碩人行狀

武林沈氏受先世禁方陰行善海內奉之如孫
思邈陶貞白璠珉丹粟百餘年矣至薇亭公而
名益著蓋薇亭公積功無改於初而慷慨好施
所交多名碩境中簪纓之胄締盟蟬聯詩書禮

樂之風斌斌盛焉至薇亭公之子而名益著伯
仲肆黌宮季游上庠而長君君接深湛讀書不
窺家園人咸稱沈氏之以儒術顯者必薇亭公
子正繇論至此而薇亭公元配莫碩人之造於
薇亭公者始大當薇亭公六歲時已失兩尊人
伯方竹公憐而收之既長受室於莫處士龍田
公女也時大父珠泉公猶在堂新婦婉順端凝
自天性旦晚奉甘麗惟謹躬操筯鑰篝燈佐讀

初集 卷之五 六十一
不以煩內顧及伯兄巽亭公補博士籍而薇亭
公始謝去制舉業守大父之訓曰此世產亦世
德也薦葦堂構務在後昆壹乃心亶乃貞鑒之
冥冥永孚於亨以勿墜其令聞則碩人肅志秉
虔藥餌之需重貲者必躬必親蓋四方不蹕而
馳而庭若九達之衢焉薇亭公性好客長者車
過之屨戶外滿則碩人所治蘇漿昌菹五黃千
品之珍畢具客無不厭厭悅康而罷有以緩急

告者不問橐有無呼吸必應時時脫碩人簪珥
無勑或窘不能償公愀然道及碩人輒云何不
弃責公笑曰吾已焚若券矣以故薇亭公布衣
市義隱若望國而一時耆宿名流樂與之游皆
碩人默相之也顧碩人艱於子甫舉一女太宰
張恭懿公稔碩人賢爲其孫孺承委禽焉今受
太常封孺人而薇亭公年甫強悠悠之口亦云
河清可俟耳乃碩人爲置兩側室曰曹曰許拊

初集 卷之三
循溫煦無所不至比連舉子四而薇亭公不逮
視其成立矣卒之時長者方九齡次俱襁褓戚
友咸謂人生奄忽十載何殊朝露非碩人卓見
能振振若爾耶然藐諸謂何碩人慟念亡者而
提四兒宛轉悲澌顧復孔亟寢食靡間昕夕稍
長就外傳恒伺其出入笑語以爲歡獨時時範
之以正及補諸生遣侍名師修脯益設每遇試
必蚤起檢筆硯親授之所擇配俱名族撫之不

異已女愛不忘規要於慈徧天性簡澹不喜綺
紈難脯而不以律其子若婦遇清燕命諸子集
同居群從諄諄述祖先積德及勤儉勗述事溫
語開誘聞者躍然感動嫺睦問遺吉凶悉稟於
禮歲時子婦上壽恒內傷以先君之思爲感有
事必告廟後行而視兩側室若左右手甘苦與
偕詞色慰藉藹如春熙至今一日也居常誠諸
子曰父志在兒輩未亡人報泉下在兒輩孝悌

爲體經綸爲用各努力吾能爲若母不能代若
爲子勉之哉諸子益感奮自樹而保護周渥老
而愈篤持家柄一生無私藏遇儉歲傾筐倒庋
不以聞諸子思其分心曠業丹青之翼若旦暮
遇之者也晚年茹素戒殺屏酬應彌留時猶訓
子若婦内外友于益厲前途三復不置焉噫碩
人在今日子婦翩躚奉觴孫兒遶膝洵云人倫
之樂矣人抑知二十五年以前初苦無子繼苦

無父殞者在堂啼者在抱拮据卒瘞綢繆牖戶
螽斯之羽常詵鳴鳩之飼若一豈易觀哉此碩
人所爲痛仲子宸而哭卒以憊也不佞鯨獲與
碩人子君接交素聞碩人懿行最著頃君接手
行略匍伏乞爲狀不佞鯨敬列其大者而幸當
代鉅公儼然賜之以銘

許母貞靜陳碩人行狀

萬曆辛亥八月十九日許母陳碩人卒於內寢

初集 卷之五 二四
兩孤袒免擗踊姑陳太恭人率群從子姓以下
哭如禮宗長姍戚撫懿行私謚之貞靖曰備三
善焉卜葬有期孤世章世竒乞銘於雲柱太史
而以行實來當湖屬鯨詮次爲狀以徵信不佞
鯨交許氏昆仲久尤習於才甫及才甫之從父
幼度俊揚才甫卽碩人次子世竒也稔母儀最
詳敬薰沐執筆以代負劔之對碩人陳姓漢戶
牖侯後宋忠肅公瓘東平郡公興裕俱以進士

顯自汴徙楚鴛湖公隆以佐

命功封驍騎指

揮累調杭州前衛指揮僉事世其官五傳至雲
門公善道中武舉進士擢衛使拒倭赭山沒於
王事肅廟卹贈建祠有特典卽碩人父也母崔
封淑人雲門公雖戎行幼隸博士籍喜文翰生
女愿而慧絕憐愛之口授孝經內則諸書若夙
契性莊默尤諳大體當倭夷輔入時家人屢聞
捷音欣相告碩人甫十齡獨憂形於色及訃至

觸地幾殞尋慰母氏曰此大人素志也以身殉國得死所矣姻黨爭賢之漸達人都而許自觀察少崖公以進士起家方備兵潁上元子芝麓公藻采豐華所至避席氣宇倜儻結納多名豪稱一時之雋初喪呂孺人難其偶妣氏曰陳媯姓也許太嶽之後和鳴鏘鏘是宜協懿氏之卜乎則碩人年十六于歸婉孌窈窕家與室無不宜者時祖姑顧太安人猶在堂繼姑陳恭人五

年以長碩人櫛緹衿纓問安視膳惟謹佩悅獻蒞如新受賜太母及舅姑咸嘖嘖稱婦賢逮觀察公歷官燕楚顧太安人以目疾艱就養則留子若婦侍朝夕極當其意觀察公藉以慰千里外迨弃世觀察公移守毘陵碩人佐芝麓公從諸父之後襄大事觀察公歸而無憾旣服除補守象郡則仍留子若婦居守顧芝麓公天性廓落不喜問米鹽瑣屑名方盛壹意公車尋入貲

成均游天下奇士羔鴈以續珠玉以掬惟恐失之交臂而碩人躬篋鑰兼出納酬應并畫咸核未嘗以家園煩內顧傾筐倒庋亦惟恐客不至賓不歡也觀察公自瓊崖賦歸去來敬愛客座上益滿而弟國博公別駕公俱善飯無恙從子侍御公亦謝政歸日逍遙湖山間前車駕尊壘後車載歌舞備人倫之樂芝麓公建翠微園築玄圃鑿池累臺瑤葩惟石務以娛尊公而碩人

從陳恭人椎牛擊鮮珍錯畢奏丙夜不怠觀察公養恬林丘稱保艾純嘏者碩人大有助焉芝麓公感脾疾不良於醫碩人籲禱備至五閱月不解帶比視含毀不欲生而思以兩孤一弱女累高年舅姑疆治喪哀號不絕聲日提子若女而絮泣曰吾之不死者以爾三人在耳脫不若於訓忝爾所生吾何以見地下則朝夕督課彌切而御子婦以禮乃周恤拊摩恒以恩勝見兩

初集 卷之五
嗣君先後游黌宮諸孫繞膝輒色喜長君困諸
生久每溫言解之曰力田逢年盡其在我安可
與造物抗乎處妯娌以和雍雍如也然自芝麓
公卽世便不復預世事已丑觀察公物兩叔樂
樂理諸務碩人惟哀慟而已扃戶端坐焚香誦
經三十年如一日僅觀察公崇祀鄉賢及歲時
蒸嘗一出戶餘悉置不問曰非我未亡人事也
蓋碩人簡靜天定而悲思亡者愈無意人間世

矣顧生平臨事不讓當查宜人江恭人出閣時
陳恭人推朱安人及已資爲治裝碩人悉心左
右至邵沈兩孺人衣飾盤匱纖悉不遺呂孺人
遺一女許嫁於郭芝麓公不能具奩碩人捐橐
以贈一如陳恭人故事終身視如已出女歸宋
次公當舅氏帥師朝鮮闔室憂惶碩人時遣慰
曰大臣爲國排難必有成筭而翁慷慨授鉞立
功異域豈見女子所窺經略公果奏凱而還觀

初集
察公討賊施州暴露行間碩人與芝麓公蹈險
長江間關趨候寇平始甘寢食豈非明決男子
哉素有腕疾頃一發遂不抹彌留之際請陳恭
人至榻前枕上作叩首狀曰婦已矣不能事姑
仍以兩孫爲累相對嗚咽囑兩孤及孫勿替先
德語無怛噫方碩人初歸時觀察一門簪黻芝
麓公旦暮青紫列鼎鳴鐘肩摩轂擊碩人志念
遠矣廉吏旣無所遺榮華消歇才甫病而耽詩

貧而喜容海內壇坫之士爭交才甫門外多長
者車迹人咸稱觀察及芝麓公風標至今未泯
者幼度俊揚與才甫延之而詎知陳碩人陰爲
補助不言而成者也今子孫亭亭玉立青冥之
期非杳五世其昌懿卜豈誣也哉倘獲銘於千
秋之筆才甫昆弟始稱碩人子矣

待贈方嶽葉隱君暨元配吳淑人行狀

平昌兩葉生自辛丑受經朗閣時從游者三十

餘人多吳閩新安之彥兩葉生文藻頡頏不佞
亟稱其才而平昌軒輶過者皆曰非獨兩生才
也其大父尚義好施其尊人佐之陰行善宜有
子也才癸卯兩葉生登督學高等長坤餼廩比
四入棘闈而尚遲一第也今年秋衰經造不佞
請曰坤兄弟不天幼失母三十餘載去冬父復
見背將啣墓門之石乞言聞人而願以狀徵信
夫薦葦逢年當自有時乃不遑祿養而求榮於

文人之不律孝子之懷烏忍負耶按述葉爲宋
相石林公裔其移居遂昌高橋再徙獨山自恭
二公始有淳操置祭田供蒸嘗再傳爲埧一公
德達性友愛季弟德潤犯法當刑公念弟乏嗣
願以身代居囹圄數年直指廉其實兩釋之生
鎮五公繼遠遠生淳九公善敬敬生森七公昭
昭生獨峰公隄世有令名至獨峰公益著正德
間宣平寇亂公倡義訓練就山築障民賴以安

建宗祠創書院置義塚輸粟賑饑有司高其行
聞於朝授七品散官子坦菴公弘淵以季子
筆陽公貴封水部郎配王封孺人生小川公以
萃公父也配王有五丈夫子而公爲長諱烜字
文盛別號方嶽從封公方山兆識不忘云公天
性孝友端謹少受儒念諸弟幼稚小川公拮据
爲勞謝鉛槧操家督內外雜沓曲當小川公意
遂不復經念乃小川公慷慨任義事益繁公分

應不爽寸畧如憫冬涉則舍田置義渡者三建
輿梁者二憫夏跋則設路亭者二創通津節者
一至於捐金首倡以新文廟鼎立社祠以聚姍
族蓋小川公與獨峰公後先相映爲德門又性
嚴毅一如其大父而公和藹欵洽又正肖坦菴
公邑人待以舉火者千指無不頌小川公樂善
不倦而喜公之平易可親也有德司契四世若
一軌矣然小川公竟以耿介不阿爲猾胥所中

初集
諸豪睥睨益求多無厭禍幾不測寃聲載道公奮不顧身昏夜間關號呼奔訴水漿不入口者數日當道白其誣得輕釋公獲就子舍薰沐奉觴以娛小川公而心血耗盡遂成足疾卒以此憊公真死孝哉處昆季以平以厚分毫不自私仲弟蚤世撫藐諸不殊已出叔弟隸博士籍績學多聞公益爲輔翼不使以家園分咕啤與兩季弟課督疆以時時交勸勉孝弟仁讓備人倫

之歡小川公與王孺人優游八十郡邑吏咸引重監司兩臺擿其門曰樂善好施比德齊齡公與諸弟及子姓歲時上壽彬彬肅穆門內如春臺和好無間則小川公宜膺諸福而公承上率下所裨渥矣公雖不以儒術顯而雅好文學念家世科第亟冀繩武子坤陞稍長能文輒給羔雁廣其聞見於通都來學湖上復執贄謝紫會先生公因訂僑札其結納賢達不啻饑渴焉獨

峰公有書院公庀具合子弟作社取其甲乙而
誘勗之嘗曰古先懿訓躬行則獲經國大業積
厚而光息焉游焉不遷異物母負先公世講之
義吾志慊矣坤陞聲漸鵲起督學洪公饒公郡
伯鄭公皆竒之試必先多士公繩督不少懈至
罷歸又以運命爲慰坤陞用是感憤業益進而
獨憐季子脆弱任其起居乃已酉哭母王孺人
躄踊極哀畢襄事足疾轉劇季子復殞於秋神

形慘怛醫禱萬方竟不效彌留時無他言惟戒
二子善事王父奉諸叔守前規蓋不越孝弟仁
讓務本節用之旨焉噫如公者率履無愆久而
彌篤豈非閭修長者耶乃上奉老親而不竟萊
絲之娛下訓二子而不逮金章之貴人固不可
無年哉元配吳孺人爲練川巨族與葉稱世姻
其姑爲孤松公少婦封安人見而喜之謂端淑
婉嫵宜爲吾家孫婦于歸益當堂上心遇事能

初集 卷之五 七十三
斷有丈夫氣親睦交口稱賢壺而厄於筭弗克
自見然能使方嶽君徘徊四載口不忍言姻事
則孺人之賢可徵矣坤陞等巳卜甲寅年某月
某日合窆而祈當代鉅公憐而賜之銘

桂陽邑侯黃吾張公行狀

萬曆壬子季夏十七日桂陽令黃吾張公無疾
而逝孤竒玲將乞言鉅公銘羨門之石而命不
佞鯨以狀徵不佞自巳酉冬獲拜公於堂公喜

甚呼爲小友每過從必具百觴公先酌以餘勇
賈鯨及香發花吐主客遺倦酒後耳熱公信口
稱古今成敗事飛談捲霧飲烽益震鯨每退而
告人曰公精神滿座上期願未足限也公亦嘗
示鯨以吐納導引之術機在子丑勤行不怠豈
意奄忽長逝將堅強悅康俱不足憑耶則安敢
辭筆墨之役以圖公不朽者按略公諱一陽字
繼純別號黃吾國初祖浩然公卜居仁和長壽

村歷數葉而傳禮禮傳演演傳寧世習耕讀陰
行善寧生龍池公中復登壬子應天賢書任潯
州司李則公父也母莫恭人公魁岸伉爽自幼
標異采五歲就外傅文稅不煩點授十四補諸
生已負雋聲初試浙闈不偶卽入貲南雍下帷
發憤時司李公宦游臨淄命公相宅以居得良
隅依山環水境會佳勝公披草萊弘堂構綺臺
阿閣旁列廬舍悉出心裁司李公歸而色喜旣

治喪葬如禮督兩幼弟玉於成每鷄鳴起讀書
黎明課園丁蒔桑種魚理家政晚上食莫恭人
子婦爲壽必盡歡篝燈啣吾聲達戶外矣十年
所備嘗辛苦生計益拓而績學亦益厚巳卯領
薦南畿兩上春官不報念莫恭人老謁選得楚
桂陽令奉母以往下車一意撫字厲志冰蘖有
訟其邑中小民於上官者力爲護持矢不遣去
至以此見忤不顧昏旦坐堂皇蝴蝶上堦五伯

如秋上稍雲根下拂地足獄中犯大辟者止一人又多所羅織爲平反脫之爰書五載無一輸鬼薪城旦舂者園扉羅雀矣邑民頌召父杜母若在其襁衽中獨於郡侯以上不喜諂事性骯髒片語不合卽躑足裂裳一官奚足羈我我知我赤子耳他何知重念母莫不能犯瘴癘決計歸養時撫臺梅鄒邵公代上乞骸疏以詞送之有云乞身強健知百姓重戀五載之恩奉母壽

康豈三公能易一日之養蓋實錄云去之日傾邑號泣送百里外俎豆於祠至今不絕歸二載而莫母卒公號踊曰使癸未不就官則有憾於生戊子不辭官則有憾於歿終天奚贖乎營葬畢仍率園丁督課如初或以瘁請曰吾帶月而鋤負星而未意自安之不爲疲也性好客殺核畢設飲兼十人呼盧滿引拍掌擊節座客盡蹠跚欲去公振袂歌呼顙頤俱動客復爲加爵西

湖有耆英會公嘗爲祭酒花晨月夕載妓以從
人望之飄飄若仙而公儉勤自天授不尚豪奢
厚族黨宗孽中無告者收之爲完婚嫁排難解
紛如抹水火掩骼施裨有急必濟與人言傾肺
腸無所恡聞隱事及閨幃卽掩口至世故物情
洋洋灑灑三峽若注矣蓋公坦誠愷易有犯不
校絕無城府芥蒂與之交久而益真開襟散誕
見羲皇之道尊遇景逍遙就魚鳥之情樂以故

卽田農野稚無不感公長者曰公親已也生平
獨教子嚴而有法長君已酉之捷郡中咸歎羨
三世俱發應天爲公庭訓著効諸孫玉立皆能
文而公亦喜爲摩額詩書益斌斌矣郡邑長時
過問安否五登賓席素無病不知有刀圭亦不
知有鳩杖亦不知有愁苦惋鬱今年五月病痰
尋亦愈一夕方引觴進數升忽坐瞑無諸痛楚
訃聞諸父老知交咸相詫謂健不足恃亦有謂

公太恃健而不知乘化歸盡公蓋騎箕尾游白雲鄉者也伏惟千秋之筆錫之以銘

勅封孺人凌母王氏行狀

夫闡幽詔遠貴覈其真象媿表微無增於溢要使歿者如生生者不愧則中郎之語足徵矧京陵之範尤罕而以輓近所覩記若凌母王孺人所謂匠心協於詩書允蹈符於金錫積粹而章不言而喻夫真難爲襲也而亦難爲摹也諸孤

將乞銘墓石而屬不佞鯨以狀徵安得燕許之手筆慰竹林之哀思哉雖然鯨之所不能者文也惟稽實事則鯨可無泚於寸管矣按略孺人王氏生錢唐太平里祖司訓庸齋公以儒隱父爲鄭府左長史臯亭公廓達超曠稱聞人祖母汪孺人母張宜人俱名家邵德孺人凝重溫順自天性不必授句讀而質之近卽班惠女誠顏柳家訓無不冥合者凌繇太安人以節顯中

憲雙橋公朱恭人率先孝讓相政益肅稔知孺人賢爲仲子授室仲子卽給諫二洲公庚午冠省闈成丁丑進士者也給諫公夙端誠不妄訾笑孺人婉嫵而莊相諧以志歸逾月隨中憲公之建昌任逮家食上奉父母及兩尊人中有伯叔娣姒敬共旨柔不踰其則一門之內和氣蒸洽太母持已方束下嚴多否少可朱恭人濟以慈弟子婦虞不當旨而孺人偕姆陸嬪顧一意

真悃進止惟命遂兩得其驩心及子姓漸繁室宇不給孺人三遷而得太安人之側僅容膝人或苦之孺人怡然曰居蘄安不蘄廣也幸咫尺太母呼吸昏旦悉以心神注之所生子女笑啼必閑無觸太母聽太母極愛憐無去吾左右而歿不以近故私一縷也御臧獲以恩勝獨不樂阿附屬垣有耳溢怒之言互傳爲崇孺人性不相入語自不至一間有聞開心諭之潛就消化

故終身有頃簞而無矛盾至其推甘分少舍精
取确凌氏素敦荆花之誼而孺人尤習焉安焉
者也南宮之捷或以榮孺人謹謝曰男子自離
經時已辨有此矣獨以朱恭人喪不及侍飯含
爲夫子終天之恨號痛幾殞未幾喪張太安人
越歲喪中憲公先後襄大事丹旄宵馳哀感道
路至今讀禮之家推凌氏爲冠冕而孺人心血
殫矣孺人舉三丈夫子最早當中憲公彌留也

太平守梓崖公尚未有子語仲吾欲子若仲子
仲愛未能割孺人委曲勸諭竟以仲子子之旣
遣不復顧偶巷遇必亟避仲子或孺泣祈擁樹
孺人正色斥之日月居諸豈無疾痛之相關者
而孺人內絮泣曰此非吾所念也乃仲子能事
太平公及陸宜人終始無間幽暗不欺戚睦咸
欽仲子誠孝而孺人所重在此不在彼念更深
矣給諫公初任昭陽邑如釜底稽天之浸登埤

現而呼庚癸者萬姓公條便宜竭胼胝所活數
萬姓尸祝以世而孺人嚴筦鑰佐公惟謹卒以
治第高行徵瀕行庫有贖羨數千金公悉發補
舊逋脫諸被繫者歸以試孺人是可脂膏自潤
乎孺人曰願公以民命爲重橐于何有公笑曰
牘已上同志更足娛也旣赴闕補禮科給事中
公所規讜議方異大展而一疾竟不待矣孺人
聞訃時舟甫迫清源昏慘悒沉絕而復蘇三閱

月病始間旣歸一以拮据家政訓迪子姓爲首
務性習勞苦自新婦至白首薌豔奉先甘麕奉
尊人已以下瓜壺菹茶以爲常早夜跪十指補
綴紉緝終不以貴且老爲解也中間娶婦者四
娶孫婦者五嫁女者一嫁孫女者一秉政十四
年稱未亡人三十年春孟登七秩秋竟以微疾
逝而隣春不相塗哭如崩悵母儀悲壺範上號
天而下踊地者相接而孺人何以感人爾爾耶

噫詩之首葛覃也謂儉勤敬孝爲王風之始也
願爲良臣盛德如砥內則豈必以琦節重哉孺
人生長統袴于歸際鼎盛膺一 封章綦厚矣而
天性勤儉昏且作勞終身未嘗以時尚纂文繡
未嘗以委頓妨刈穫含飴遶膝不廢鍼組可不
謂難乎其尤難者推誠平恕替羨樂成困苦迫
身心無愼枝敬老恤幼剛柔不偏而其尤難之
難者綜理極密而不露才大禮必諮家長慈惠

極徧而不任德寬和出以坦衷悶悶耳融融耳
事來卽應境過卽忘寧約寧退必不欲以賢智
先人而篤倫常持大體一身之德修備矣遇子
若婦藹然如春寒必熨冷身手相藉至告誡必
稱太安人及先世彝訓對群從子若婦亦然家
素著清白析箸後幾不振悉解筭釧以佐乏每
歲分視周巡若鳴鳩之飼雅念外家與兄台山
公白頭于喞然未嘗私厚外家愛女及壻急望

其成名亦無所私於女其哭婦及女俱以時而
獨值給諫公忌辰爲終身之戚子若孫讀父書
俱負雋聲矯矯干霄之翼矣而孺人勉旃終不
以進取先行誼子若孫恂恂醇謹豐華內裕而
恒以質勝者皆孺人身教則發祥正未艾也生
卒子女云云不佞鯨敬摭實以請而惟天當代
鉅公錫之以文

處士松巖吳公行狀

當辛丑春余初成朗閣四方來問字者三十七
人而新安吳和仲爲授經之首講德居業周旋
靡間及余內兄翁子先出守撫州卜師吾門余
以和仲應賓主歡洽至今如一日盖和仲厚積
攻苦足以益人而粹穆恪真自堪訂久要也余
因獲交其尊人松巖公淳懿長者每晤必欣欣
如笑詢和仲知公朝夕如此未嘗見怒聲厲色
余嘗戲謂公無平子絕倒之癖而備季野四時

之氣玄家稱養喜神公其爲導師哉相視復笑
坐必竟日公年八十倦游別余還商山余繪圖
爲壽計公必登大耋乃踰二載而逝然飲食步
履不殊壯時雖嬰脾疾不戀床褥飯含無怛噫
公所謂乘化歸盡逍遙白雲鄉者乎和仲將以
冬孟舉襄事走使緘哀而以狀請曰痛諧之勿
獲祿養先子也惟乞銘文人以榮羨石藉師言
有徵焉及讀行實恍然覩公色笑倍增感悼而

從其請公吳姓諱糾號松巖商山望族自宋文
肅公而後閱九世爲士仁公士仁生耕讀公耕
讀生慕耕公慕耕生古石公公父也母戴孺人
蚤世公孝友自天植奉古石公色養備至古石
公羸弱善病不任家政則謝儒代爲持籌而貽
尊人以逸客千里外音問不絕有甘膳必緘致
古石公喜彈箏蹴踘方外之交公廣覓異術竒
花以娛其志聞訃踵趼奔號幾至滅性喪葬必

初集
卷之五
虞捐產勿恤痛母戴見背歲時捧盤匱跽几筵
而淚涔涔下曰祭之豐不如養之薄也撫異母
弟木齋公出入與俱歡如腰鼓瀕危扶歸調治
以慰首丘無一不躬致其慎戚里咸稱君陳爲
政公其無憾云性剛介見人善津津贊不容口
遇狎邪及聞人之惡輒咋舌避去尤嚴取予宗
人子以數萬金委公出入有乘間爲覬覦者公
毅然曰奈何以存沒愧吾寢衾乎卒完其子母

登籍無錙銖爽族兄易篲時將析產部勒定矣
急徵松巖弟來署名需此瞑目蓋生平重然諾
若王彥方杜務伯片言可券也以故所至多耆
碩端士與結殷勤驩公亦傾筐倒庋應接不遑
一二宵人有齟齬之者見公坦衷無城府尋亦
冰釋矣幼不果爲儒而儒行魯餘優於儒者酷
嗜書琅函秘笈見必購歸手自裝潢什襲奉之
壬午爲鬱攸收去心怏怏不樂後所蓄藏本尚

不減鄴架百一也和仲夙慧公屬之爲儒以竟
吾志旣隸博士弟子籍名雀起公喜爲加餐策
勵恐晚或不偶於試又食貧無從具珍錯而公
復廣爲解曰汝第力田無羨逢年菽水可甘何
煩齒肥也聞有賢豪及名下士輒命和仲整履
焉公亦藹然相接每訂僑札之好過吳門王百
谷先生邂逅莫逆時又庶其行欲爲立傳而公
遜謝然相洽且數十年竿牘可百函亦足徵公

敦篤友道矣素甘澹泊晚年益斥鮮麗布袍芒
屨行不携鳩往來湖山間浮白微醺放歌踏堤
以返蕭然覺身在塵外也紙窓無事取所藏書
盡自娛聽諸孫讀書女孫誦詩怡然終日客至
彈棊命酒秋來工蟋蟀鬪決善敗巧中形神矯
健天和充盎法宜上壽而履順以寧公其有道
之士哉膠庠中曾有以賓飲請者公避席不敢
當族子以容臺冠帶至公一再被服非其好也

雖然有和仲在 寵章且賁泉臺此以揚盛德
作先聲亦可矣惟 當代鉅公錫之以銘

鄉進士若鏡高公行狀

萬曆乙卯秋閏十三日若鏡高公以疾逝其同
籍二三兄弟環而哭之哀曰安有學綜如功彥
而艱於第闈修如功彥而嗇於年天道何可問
也踰朞孤大臨將啣襄事不外索而徼靈於我
同籍兄弟銘羨門之石率二弟蒲伏首以狀丐

諸不佞夫蘭桂有芬清暉自遠而寓言雕篆宣
燬表幽實二三兄弟責也安敢辭按畧高出宋
功臣裔自汴扈蹕而南由山陰徙仁和則著自
國朝琴月翁翁生竹坡公壘壘生筠泉公應鸞
應鸞生南岑公淞淞生肖巖公汝梅卽功彥父
也母錢氏顧高氏子姓不甚繁而詩書最著自
穎湖公以風雅發聲有光州集行於世迨新城
邑令少穎公及福寧州守肖巖公至功彥蓋四

登賢書矣福寧公二十四舉於鄉踰八年始生
功彥父子濟美尤郡中所艷稱云功彥性端重
不妄笑語裊躬若執玉捧盈取予必慎每同籍
宴會無不莊事功彥者而坦率任真與人語務
傾肝膈不喜粉飾又多方振人之急有諾必赴
無不人人在其披拂中也天性孝友自幼事大
父母曲得其歡心及隨福寧公承顏官舍以蔬
糲佐其廉歸而修甘膳負劔以隨鳩杖福寧公

怡游湖山間且以解組爲樂庚戌報罷後忽心
動脂車還南似不可一息待者甫及家而福寧
公疾作晝夜醫禱務以身請十五日卒不起歛
首足形必誠必慎倘稍緩頃臯恨終天莫贖矣
踰年復丁母憂黽勉二大事心血俱耗讀禮中
日與青烏氏徒步隴巘冀得善地以妥二人不
必得而病勢益蘊崇歲時上食靈几崩號如初
喪值母忌辰一慟輒沮奄奄不復良於藥悲哉

功彥昆弟五人同乳者一而推甘佐鮮始卒無
間言又能體父母之所愛愛之讓以已椽聽其
售不分毫介念敦睦族姓以恭以和擘畫必忠
臨事毋讓長幼咸倚左右手焉生平讀書務沉
驚篝燈丙夜不校寒暑爲文體認旨奧豐縟有
竒致初爲紫溪蘇先生所拔隸弟子藉試必前
茅顧屢躓於鄉意抑鬱不自得子女旣多食指
益廣向平之累不乃爲董惟混福寧公垂橐而

歸復無所佐攻苦元配鍾孺人簪珥頗充則稍
爲經理出入奉堂上精滲及膝下餽飪戊申遂
註析爲五男計矢不復問家人產已酉脫身游
北雍四方賢豪無不虛左功彥者竟以詩冠本
房間里爭稱功彥策怒馬握雕弓高墉射隼一
往沒羽壯哉詎意一上策南宮不收癸丑以艱
阻今竟止此也修短浮沉抑互逢百六耶當功
彥南還時有貢士錢漢畦者卒於途脯糲絕矣

僕夫持所著文爲券功彥知爲塾師哭失聲卽捐貲付奚護其喪歸到濟上一价病危甚功彥時急歸戀戀不欲捨至感醫士而賴以甦此皆根心仁篤非市義爲名高者也噫功彥已矣然功彥有子大臨聲噪膠庠堪紹其先業諸子亭亭玉立皆干將莫耶之選有一於此足慰夜臺况五丈夫子龍鬢鳳鬣光華何量哉功彥不泯矣功彥諱時亮號若鏡功彥其字享年四十七

歲惟 詞壇鉅公念同籍之好錫之以銘

贈承德郎兵部職方司主事道誠沈公暨封

太安人鍾氏合葬行狀

代

沈職方道誠公布衣任俠敦德藝善鼓計然策自晉徙越身創其高閎之閱稱大宗而鍾太安人三舉丈夫子仲爲方伯君勅法明章號五長十聯之最當贈公之歿也方伯君甫舉於鄉庚七年成進士佐績名藩太安人所至以板輿從

洵膺 寵綽翟禴力珍撫斑斕竹馬壽七十四
考終福備矣方伯君時晉山東右轄竣闡務始
歸以不及奉飯含爲莫贖也語必袒慟丐狀嗇
羨門之石泚筆宣媿効役恐後何敢辭按實贈
公諱士寧字邦靖別號道誠先世居晉襄陵之
趙曲自宋逮 明有彥禮公負時名稱鄉祭酒
至倫公拓其緒生均器公倜儻尚志節類魯朱
配李安人益慕義無怠生子四贈公其季也自

幼魁梧卓犖有大志不屑屑句讀亦不喜么膺
末務纏束精警馭怒馬出韓魏齊魯間浮江淮
而下抵吳越用鹽筴起家輸貲佐邊儲以羸饒
自衛手畫心籌所至傾其儕偶隱若望國每得
四方竒珍緘寄堂上廉贈公磊珂善樹喜爲加
餐伯氏偃蹇食貧時以羨給之金昆玉友歡如
腰鼓尤佐人緩急摧剛翼柔弄丸而解兩家之
難同事者倚若十重鏡步障一夕行塹谷巨盜

初集
伏叢莽間暴戾恣睢鳥慄獸駭贈公單袷往諭
衆相顧錯愕羅拜解去時比之張乖崖云某甲
以行鹽被逮法當戍公挺身捍衛寃得釋其人
爲中山狼置不問客淞陵時里中王某病死方
寇警巷無居人贈公獨依樓旅襯授諸孤始去
居西夏同舍唐子病且革執贈公手出橐金以
吾翁爲託匝月翁始至贈公跽進遺金封識寃
然翁泣拜願公世貴顯多賢子孫遂指素所卜

吉地示公公後以藏兩尊人其旁可置萬家邑
蓋贈公天性廓達耻爲季心郭解以睚眦辨恩
怨而遇不平事必髮上指冠揮金濟厄操縱如
意感恩者旦暮籲祝公曾不挂胸臆計其鐘鳴
鼎食不足酬公壯槩矣方伯君夙慧彊識垂髫
攻舉子業有聲贈公聽書聲酌大斗自娛讀經
傳子史析疑䟽難每每暗合伯仲相繼游膠庠
益勉旃立德立功務期不朽耆年劬游營菟裘

修業而息間返故都郡邑大夫邀致賓飲一再
往輒遜謝曰吾褒衣緩步揖讓禮樂之場於分
侈矣母多恩迺公爲也親知故交歡然把臂觥
籌交錯飲多不亂或獨坐嘯歌亦必命觴酒後
耳熱昂昂若冲霄漢戊子方伯公登賢書伯子
亦幾僑而贈公卽以是年仙去噫贈公生平歷
險難犯霜露運竒審會智福兼隆以拓大其基
業晚年杜門養恬盡歲其躍馬賈勇之氣以願

性情篤倫軌詩書之澤於茲發軔登壽七十有
七豈非偉人天植者哉贈公元配楊安人出同
邑望族不宜子客錢塘聞鍾太安人婉嫗端靜
遂委禽焉太安人父東泉居士母方氏年十六
歸贈公鷄鳴問佩敬共勿替每生子報楊安人
喜爲加額彼此覬遺無虛歲聞安人訃慟絕復
甦居恒念贈公濶大伉爽不欲以米菹齷齪煩
其慮躬筦鑰井飭時時具精饌廣侍姬惟贈公

意之所嚮側室焦氏旅居外邸迎與俱復爲經理其子女婚嫁不殊已出性節儉諳大體識量明達賢聲澈內外督諸子攻苦咿唔不問寒暑方伯君成進士司李開封太安人操內棊闕若無人焚香兀坐以祥刑赦青爲訓聞榜楚聲輒弗擇曰無令我效雋母返故里也有青矜忤王國幾不測方伯君當讞斷太安人戒曰強宗鷲橫奈覆盆何法如枰不能爲人作輕重慎之哉

方伯君謹受教民籍以不寃已備兵井陘肅憲貞紀要而不煩一稟太安人指偶齟齬貴人方伯君翩然有歸志太安人諭以大義益勵精視事如初尋擢東魯觀察而太安人溫語爲慰曰吾翟翹霞帔優游歲月國恩深重宜祇載報塞無以竹筭行船煩郵遞也歸含飴弄曾孫勸塾讀朝夕皈命瞿曇斷除識想大有契于觀空破妄之旨宜享上壽而乘化賦歸來矣然方伯

君和雅莊恪志操凜然識者咸稱台衡重望建
牙非遠膝前燁燁英多蔚成名閥則贈公與太
安人隆施豈有艾哉不佞用徵往詔來務核其
真不至阿所好矣惟 當代鉅公錫之以銘

先慈行略

痛哉天乎胡奪我母氏如是慘也不肖鯨卽恐
死湏臾亦何所容於人世顧念母氏拮据艱難
佐先君以勗不肖者矢志欲成不肖爲儒今不

肖鯨竊讀儒者書而不獲徼 有道先生之言

志母氏不朽鯨卽覩焉人世慙恫奚贖因含哀
杖淚撫生平一人大節屬舅氏狀以乞諸 有

道先生之門母孫氏諱婉言世居錢唐江滸冠
帶耆碩古塘公恩元配趙淑人所生長女也孫
出龍門喬冠蓋蟬聯古塘公貌魁岸性高挺樸
直富而好施里中人爭磬折下之奉爲杜務伯
劉志安模範仲弟懋治博士業聲聞當道干旌

之使不絕邑里中莫如孫姓最著時先王父襟
江公玘方接薨而居王母嚴氏所生三男長南
洲公鑑次先君諱銳號中洲次三洲公金世系
詳進士望雲趙公所爲先君誌中先君生孱弱
善病不宜婚年二十六始卜婚顧吳之先自學
博公顯祖隱居武林山子孫多以末起無儒服
聞人至王父業中隳先君齒又長母十齡或妣
氏無徃孫而外大父古塘公居恒識先君孝友

醇篤視履端簡類古君子心獨許可之遂一切
報謝諸赫奕者指先君示妣氏曰是宜有令福
堪當吾女吾誓以吾女朔未起之聲終不欲殉
垂燼之焰也王父聞之驚喜因納采焉年十六
歸先君母氏自孩時不妄嘻笑昶躬凝重端肅
出自天性每見人必以禮法自束雖閨幃中嚴
若朝典遇逸于禮法者輒走避諸姻戚子女望
見母無不歛容屏息外大父古塘公亦謂每對

吾女令人消邪僻咎竄之習性純孝蚤失趙淑
人事繼母徐如其父孺慕殷懇撫徐所生二女
一子眷戀彌篤徐母亦仁慈善鞠育人不知母
氏非徐出幼不喜習女紅獨工書篆雅觀古今
史書常出已意揚摧成敗事悉中旣入門執筭
見堂上惟謹而恭事先君交相欽如賓人皆謂
伯鸞德曜今有其兩比念先人之敝廬止一椽
相內外至不能布武卽脫簪珥奉王父爲更置

新居稍敞方次第相先君理生計而不三歲伯
南洲公蚤世伯母陳守柏舟操藐諸孤纔三齡
又三載王母逝又三載王父逝先君稟脆薄復
損於哀過勞苦甫服闋年三十九病遂劇奄奄
存微息耳母日夜飲泣籲天露禱求所以活先
君者萬方無不至病在脾食飲小不當輒嘔聞
人言卽眩悸母躬秉筭鑰馭減獲咸井然夙辨
而時時翼蔽先君不令中寒暑纖微事不涉先

君耳目粥糜非手調不以進稍健飯居先君于
吳山三茅觀家僮日數十往返問起居劑嗜味
如是者歷三載始充然色澤復故而橐中脯資
罄竭矣母因指計日與四壁俱立以待枵寧有
通時遂謀鬻新居與叔氏瓜分之而以祖遺椽
屬三歲孤管轄曰是筭路藍縷不忍棄也顧所
分貲既不饒而念水澤之國易興利諸泉貨灌
輸莫如華亭便則從先君游華亭迺先君自久

病後溽暑必挾纊莽蒼必板輿不任煩劇母素
神王精力百倍視聽常先人于是手擘畫操竒
羸懸計千里外消長不爽尺寸先君握麈尾指
揮紀綱之僕與時上下母軒輊功伐壓衆意業
用烝烝起凡越春秋十有五所治家人產稍給
昕夕而母氏從叟先君曰可以歸矣奈何以錐
刀易故園歡笑卽檢點生業器具悉命所撫三
歲孤掌之先君故母事寡嫂迎養于家子視三

歲孤共飲食先君示之事母復提其耳訓迪以正尋擇同生姊之子妻之而至是孑然入儼然堂室具設矣歸營菟裘斲堊俱受母氏指及燕落諸賓客故人各捧觴觴先君君夫人筭而丈夫者也卽巴清善守何如君夫人善創耶先君謝不敏已而曰人生饘粥自有分定非强有力可倖致第吾十六年天日則吾婦賜也微吾婦吾墓木拱矣自此以往惟香燈供佛杖屨湖山

間以娛餘年何敢復有分外希覬是歲秋先君及母同患瘧母病瀕危幸平復而先君以積羸竟不起享年僅五十五痛哉母負病起擗踊慟不欲生徐母及諸舅力持之少間卽手把不肖鯨腕若年少無過損似而父本撥枝葉終難培也悉出篋中遺貲殯歛務隆腆種種浮于家之有曰吾奉藥餌一生歿反不得進一七水命也夫吾以此分吾痛耳嗟乎微母氏明達善息先

君幾不免首丘之恨母六孕凡二女四男所留
惟長姊及最少不肖鯨姊賢淑柔嘉極當父母
心鯨獨子父母亦最鍾愛之先君性慈煦時置
于懷母御子女獨以嚴時時訓誨皆先王法度
之語跬步稍挑脫必正色呵責不少貸子女每
侍食恒兢兢不敢仰視有以張弛之說進者謹
謝曰幼子常視母誑吾務端其本源不肖鯨六
歲就外傳九歲屬文塾師稱有小慧十歲知讀

史記漢書左氏傳丈人行過而禮之至或引爲
小友則母氏日擊牛酒盛供張令遍游華亭諸
才士每暮歸必課讀至丙夜塾師枝筵菽母必
取而閱之批詞小不當輒譙讓曰何不日進乃
退耶年十二則命從錢冲夫季梁兩舅氏於虎
跑勝果諸山非浹月不聽歸兩舅氏憐愛不肖
鯨或不惜齒牙餘論武林士因稍稍頰首鯨旣
不肖鯨亦稍稍知論交則母氏益日市牛酒盛

供張令遍游武林諸才士而所爲繩尺步趨遇
訾失必斤斤刻責之者視童時如一日也顧試
有司不售則母氏又未嘗不好言慰諭急浮大
白命不肖鯨強自寬逮不肖鯨年漸長屢擯有
司益落魄又浮慕古倜儻竒服之士高視濶步
耻與俗人伍則里中競相詫謂夫夫者特其母
氏以酒食博諛詞耳烏能識丁字母氏聞之微
笑曰吾兒誠踈跣然未必不千里迺欲舉肥耶

此不足憾吾志也不肖鯨用是益感憤肆於學
壬午除先君服入郡學宮乙酉旣廩遇督學試
輒高等四方士尋有以脯修相延者履戶外滿
而母氏欷歔泣下曰恨不令而父見也稟縣官
餼必祀先君方發封每歲時伏膺哭先君必盡
哀左右無不掩涕顧生計自喪先君費不貲家
奴乘在疚竊數百金叛去不肖鯨復兩娶婦繼
連遭大侵不肖鯨交游日益盛母截髮剝薦務

初集
具賓主禮蓋時詘舉羸越春秋又十有五而母
氏心血耗盡矣客歲甲午秋不肖鯨業已四報
罷不肖鯨因跽請鯨無賴日馳老母憂顧進不
得升斗養退復不能以菽水養鯨且愧欲死不
比干人子自今日願躬督家政無以煩母氏母
泫然涕淚不止曰自吾爲而家婦以十六年侍
而父病如臨淵履冰有生死之憂以三十年課
而讀如哺烏飼蠶有成毀之憂以二十六年嫁

而姊來如旅去如訣有離合之憂吾晨旦在悲
愁中含酸茹荼今且頭涔涔耳淫淫人壽幾何
豈好作苦哉但吾視而性廓落有大志政不欲
以米鹽細務溷而清虛之府耳吾旦夕視而樹
立以遂吾一生不解之念卽勞頓吾自甘之不
然吾謝事久矣鯨流涕固請則以室中事悉付
婦經紀而身率先僮婢興必辨色寢必漏盡外
虞萑苻內虞重黎時惴惴如常不少休曰吾習

久性成不自覺也今歲三月母介六十壽辰起
子女羅拜膝下歡甚母獨哽咽欲泣復隱忍者
數亟命懸先君像子女恐傷母氏心乞止之母
益哽咽曰吾得侈于而父五齡矣令而父在且
稱七十翁輝煌筵几顧不侈歟吾欲俟殺核酒
醴來先薦而後嘗之不爾中如刺不能下也比
諸姻里族鄰及四方士之辱交不肖鯨者珠履
交錯爭持酒幣進母氏詩若文盈箱帙母氏出

肅容勤拜起迨暮無倦數態諸辱交不肖鯨者
咸謂母夫人豐頤彊質神炯炯法宜享上壽私
慶不肖鯨迺不肖鯨心識母表苑而衷疲精力
日漸損方圖聚參朮具常珍效村居之樂乞歲
月于天而一病卒不起痛哉病自七夕起不甚
劇興居俱如常十二展轉寒熱亦易解十五天
初明猶爽然已刻元氣陡泄息漸漸醫藥俱不
給遂瞑瞑之時無諸痛楚狀色如帶歡容經宿


不變嗟乎天哉孰不有母胡奪我母氏如是慘
也不肖鯨今日卽裂肝摧膽何裨母氏哉母生
平持正識大體鉅細事務出衷愫挈真心圖之
不欲爲文具亦最惡夫貌飾者處人雖嚴整不
可犯然不樂苛責尤好施予所遇必有恩故人
皆欣欣幸就之初佐先君游華亭待先君舉火
數千指咸陶然得所先君常三拾遺金三覓其
故主返之母氏舉額謝曰人幸完所遺君亦以

遺君之子旣還故里日迎母徐及姑姊妹于家
備甘膳無虛日姻鄙或貧窘自匿人亦多遐遺
之者母媿問獨諄切每護持人困危如身被創
惟恐其不蚤植也不肖鯨間所奏方物海錯必
分餽諸姻鄙務周洽寸縷不以自私嘗曰但願
吾兒蚤成獲展吾志令三黨之親無不被溫飽
足矣不肖鯨凡兩娶婦必擇儒家女人有以奩
資餌母氏者悉謝絕曰吾夢寐中矢吾兒爲儒

奈何不令就齊傳視婦如已子每事必躬作勞而貽婦以逸見外家多文人與不肖鯨交相切劘輒色喜謂吾擇婦正謂此耳幼時奉大士甚虔然雅不喜師尼及先君見背母齋居誦佛號諸品經日千遍始進一二師尼愿樸者善遇之迺其慈儉惜福居心平等務積累幽暗中則性自有之非藉口瞿曇祈福田利益者也生于嘉靖丙申三月廿一日巳時卒于萬曆乙未七月

十五日酉時享年纔六十子一卽不肖鯨娶鄭氏繼王氏女一歸夏汝洲生廷試廷詔詔補邑諸生亦母氏所摩額而夙夜望其成名者也嗟乎不肖鯨生任放不能約束馴謹閑於母氏庭訓又不能蚤自策豎以間睥睨者之口吾母氏日稿心枯腸間關險阻相先君定家室令不肖識四方賢士以速與其成迺僅稱茂材母以歿而今已矣不肖鯨愧且死不得稱吾母子痛哉

不肖鯨竊伏讀史所載陶士行劉真長母夫人
俶節竒行照耀今古其子亦皆以行誼文章能
致母聲施異代如吾母識鑒精敏矯然丈夫志
每事堅決多竒中貞操豈少讓焉顧不肖鯨弱
植無文采足爲母氏重令母氏汨汨與儕伍同
湮沒是用裂肝摧膽瀝血而亟哀鳴于
先生之門者也惟
先生憐而辱賜之母氏不
朽不肖鯨死且不朽



卷之四